

## **ASO LULU, 24 FEPUARI 2021**

*Na toe faaauau Taulumaga a le Fono Aoao Faitulafono i le itula e 6:14 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

E toe faatalofa atu i lenei vaega o le afiafi i le paia maualuga o le Palemene i le afio o lau Afioga i le Taitai o le Malo ma le Kapeneta e faapea foi Minisita Lagolago, tainane foi lea Itu o le Maota i Taitaifono o Komiti Tumau a le Palemene, faapea foi sui usufono mamalu uma o le Fonousu a Samoa.

E faatalofa i le tapuaiga mamalu a le atunuu o tapuai mai i maota ma laoa i lenei afiafi. Ia, malo le tatalo, malo foi le papale, o lea o le a toe amatalia Taulumaga a le Fono Aoao Faitulafono. Ia tapuai maia.

E le galo foi Afia i le vao. E ao foi ona matou faatalofa i le paia maualuga o le aufaigaluega galulue a le Atua o lo o faanonomanu ma tapuai ma tatalo ina ia manuia ma sologa lelei Fonotaga a le atunuu. Malo tatalo, malo foi le tapuai mai.

E faataaiaese Galuega a le Fono Aoao Faitulafono i le aoauli analeila o lo o saunoa talifuaitau le Afioga i le Minisita o Tagata Tafafao Maimoa Mai Fafō i mataupu sa laga i saunoaga a sui usufono mamalu o le Palemene.

O le mea lea, o le faaaloalo e tatau ai, ou te tapa ai lau Afioga i le Minisita e te tulai mai e faaauau lau saunoaga e talifuaitau i mataupu sa laga e sui usufono. Ma le faaaloalo.

**Afioga Hon SALA FATA PINATI:** Lau Afioga i le Fofoga Fetalai, ia o le agaga o le faafetai i le Atua o lea ua matau atu ma le totoa ua molimoli mai lo outou soifua i lenei itu o le aso. Ae o le a faapea ona faaauau se tautalaga e tusa ai ma faamaumauga ua tuuina mai.

Lau Afioga i le Fofoga Fetalai, o le Ofisa o Suetusi Sili ma Suetusi ua i ai ootootoga e pei ona i ai lenei itula o le afiafi. Sa leai ni lauga e fesiligia ai le

galuega a le Ofisa Sili, le Suetusi. Pau le leo na faalogoina, o le faafetai ma le faaeaea mai. O lea e avatu ai le agaga o le faafetai i lau Afioga i le sui usufono mamalu ia Faaulusau Rosa Stowers faapea le Afioga i le Taitaifono o le Komiti o Tupe lau Afioga Aliimalemanu Alofa Tuuau, sa oulua faafetaia le galuega ma le tulaga ua i ai nei faamatalaga o tupe, o le suega o tusi ma lipoti i le Palemene, ua le toe i ai ni galuega tuua e pei ona sau ai i tausaga ua mavae. Sa faamalamalama atili foi e le Afioga i le Palemia le talaaga o le atinaeina ma le faaleleia o le Ofisa Suetusi talu mai lava le amataga a o pulea e papalagi le ofisa. E toaititi foi le aufaigaluega. Ua a nei? Ua tele Suetusi faauuina i le Ofisa Suetusi. Atonu o le mafuaaga foi lea ua mafai ai ona kilia galuega tuua sa i ai i tausaga ua mavae. O le lipoti a le Ofisa Suetusi lau Afioga i le Fofoga Fetalai ma le paia o le Palemene, sa le faafaigofie le galuega, sa fai si umi ona taumafai e kilia le galuega tuua po o le backlog ma outstandings e sili atu ma le 5 tausaga galuega tuua ua maea. Sa amata mai lenei galuega i le 2010, i le na o le 59 galuega sa mafai ona lipotia e le Ofisa Suetusi. E oo mai i le 2015, ua faatoluina le numera o galuega sa mafai ona lipotia e le Ofisa Suetusi ma oo atu ai galuega sa mafai ona lipotia i le 166.

O le tausaga 2019, sa taunuu ai loa i se tulaga ua le toe i ai se galuega tuua i faamatalaga o tupe, o suega o tusi na lipoti i le Palemene, ma faatumauina ai pea galuega sa lipotia i le sili atu ma le 100 galuega. O le faamoemoega tele o le aveaveai pea lea i le tulaga lelei ua i ai nei ina ia aua ne i toe see i tua ma toe tulai mai faaletonu o aso ua tuanai. O le fuafuaga mamao a le Ofisa Suetusi sa faatino ai le fofō o le faafitauli mai le 2010, sa faamuamua le faaleleia muamua o faamatalaga o tupe, suega o tusi ma lipoti i le Palemene, i Matagaluega ma Faalapotopotoga a le malo. E peiseai o le mafuaaga lea ua le toe i ai ni galuega tuua, ni faamatalaga o tupe, suega o tusi, lipoti i le Palemene a Matagaluega ma Faalapotopotoga.

Sa fai faatasi lava le kiliaina o nei galuega tuua ma le faatinoina o nei galuega moomia i lea tausaga ma lea tausaga, ina ia aua aua ne i fofō atu lenei galuega tuua i tausaga ua mavae, ae tulai mai galuega tuua o tausaga fou o lo o faagasolo. O nei gaioioiga ma tualumaga uma sa le mafai ona faatino pe a na le seanoa le fesoasoani mai a le Taitai o le Malo, faapea le Kapeneta e ala mai i le tulaga tau i le siitia o numera o le aufaigaluega, siitia o tupe ma seleni mo le faatinoga o auaunaga ma galuega, siitia o le tulaga o le tekonolosi ma le siitia o le aotauina o le aufaigaluega. O le agaga faagaetia foi lau Afioga i le Fofoga Fetalai ma le mamalu o le Palemene a Samoa, ou te fia taua a outou Afioga aemaise le faafofogaaga a Samoa, o se mitamitaga i le tele o au tama fanau aoaoina, ma o lo o tumau pea lava i le silisili i tomai tupito silisili, ma o le mafuaaga foi lea o galuega siisii i le tupito silisili ona o le lava aoaoina.

O le uunaia e le Suetusi Sili o le tulaga tau aoaoga ua amatamea lava ia. Ma o fua la ia o galuega lelei sa faapea ona faatino e le Afioga ia

Fuimaono le Gafatasi. O faailoga o Masters, e toa-14 i latou ua ausia nei vaega. E 14 masters. E toa-fitu o i latou nei e mai Ausetalia. E toa-lima mai le Iunivesite i Saina. E toa-tasi mai Amerika 1 mai Niu Sila. O faailoga Masters o lo o tau faaiuiu e toa-ono, e 6 o lo o faapena ona taumafai e faaiu a latou masters. E toa-lima i latou mai Ausetalia, 1 mai Saina.

Ona oo mai lea i le faailoga o le Doctor i Pisinisi Administration. E toa-tolu i latou e aofia ai le Suetusi Sili o Fuimaono, le Afioga i le Gafatasi. O le tulaga maoae lea ua oo i ai le Ofisa Suetusi Sili ma Suetusi. O lona uiga, e le toe foi lava i tua ni backlog po o ni galuega faatuai i le suega o ni tusi a Matagaluega ma Faalapotopotoga a le tatou Malo. Faafetai i alo ma fanau. Amuia i latou ua latou tausinio ma ua latou pale po ua latou umia nei faailoga. Ia, o uiga vaaia foi ia o le taumafai o tatou tagata. Aua o le mea moni lava lea, manage is power, power. Aua e te mafaia mea uma i lou atamai. Ae a e iloa ma le alofa ma e le faasaga ae ou fofoga i le Atua ma e faapea ifo, le Alii e, ou te faia mea silisili mo Oe. A ia aua ne i galo ia i tatou le tapuaiga a le nuu, o ou aiga ma lau Faigamalo.

E le faagaloina foi le Ofisa Suetusi i le lagolagosua ma le galuega soosootauau a Ofisa Sili o Pulega po o Faauluuluga, faapea ai aufaigaluega a Matagalueg ma Faalapotopotoga a le Malo. O fua ia. E fua mai mea lelei i le lelei o Taitai. Samoa o le mau lea ou te avatu. O se mau e ao foi ona ou faailoa. A o lou tu mai, sa matou agaia le Faigamalo a le HRPP ua leva, le vaega a le SNDP sa matou tutu mai ai i tua ma taumafai e faatoilalo le pulega a le HRPP. Ma e le na ma le laina mea na tutupu. O le mea moni lava ia, o le tualaga ma le aveseseina o faamatalaga, sa faapea ai le tala... po o le 2005 i le 2004 lea ou te taua a o lea ua faitau 10+ tausaga, 16 i le 17 tausaga. Na aumai ai le faaupuga lea, o le a faatau uma e le HRPP fanua faaleaganuu a Samoa. O upu ia. O upu ia e matau mai. E le i i ai se mea o ia mea na moni, e sese uma. Sa faapea ai se lagona a o ou tama ou te le i sau i le palota i le tofi. Sa ou fesiligia ai ma ou faapea atu i lou tama, tuu ia le SNDP ae tatou o e lagolago Tofilau ma le HRPP ma Tuilaepa. E le i faigofie upu a le toeaina ia te au. "Pule oe, a oo i lou taimi, fai lou taimi. O le aso ma lau tautinoga, ou te le faalata se isi. Afai lava e sae le vaa ma ou faaletonu atu ai, ia malie oe le atalii, ona ua pau lava." Ou te fia faaleo le lagona lea e avatu ai le le faamaonia o faamatalaga lea ua sasao faaafi i le tatou atunuu faapea ua leaga le taitaiga ma faaletonu mea uma. Ou te faafetai i le Atua Silisili Ese ua na tofia lou nei tagata vaivai e tautua ai le Malo o Samoa, tainane lou le tagolima ma lou le maua o ni manatu e faaleo ai ni ou vaivaiga ma ni taumafaiga. Ae ou te tuu i le Atua aua o le Atua na te foai, o le Atua foi na te toe aveese. Le paia e o le Maota, e fai lau tala i Ofisa Sili o Pulega o Matagaluega. Aua o nei o tatou, ae o a taeao o latou. Fua mai e outou la outou galue i mea o lo o faatino i le taimi lenei, aua foi tou te tusitusilima. Na pau lava lea o le agaga e faatino, ia faimalie

ma fai ia mafai a tou galuega ae aua le faaituau. Ua a nei la le HRPP? O fea foi o i ai le SNDP? O fea tala tauave faapea, o le tamaloa o Tuilaepa lea ua uma na ia faatauina eleele o le atunuu. Talofa i le tagi mai ala, ua avatu tala le... tuuaifuaina. Ou te manatua lava le upu lea, amuia lava, ua faasatauroina lo tatou Faaola, o lea ua tausoa e le Afioga i le Palemia le avega o le koluse lea sa faapea ona tauave e lo tatou Faaola. Ma ou te fai atu lava, e molimau mea lelei e te faia, mea tatou te faia, e le na o le Taitai, a o tatou uma lava. Fesili ifo lava oe, aua le tuumumusu i tua. A i ai le mea e faaletonu, aumai sao, fesili sao. A o le o i tua, aua a suluia loa e le malamalama le pogisa, o i ina faatoa tatou maua ai o le tatou faamoemoe. O le tele o sulu e maua ai figota.

Ma lau Afioga i le Fofoga Fetalai, ou te faamalulu atu, ou te faamalulu atu lava. Afai foi ua paopapa se faaupuga a o se lafoga ua le tautamalii i la outou faafofogaaga, ia ave i nuu le aina. A o le tautalaga, e moni le tautalaga. Ou te tuu lava foi au i lalo i le mea e o i ai uma i tatou, ou te le lei lava ona ou faalata ma faia se mea e afaina ai le tatou potopotoga, le tatou tautinoga, o lo tatou faamoemoe, ia tau, ia sue se ai, ia sue se manuia aua le lumanai.

O le malosi ma le limataumatau o le Ofisa Suetusi, o lana aufaigaluega faapea Suetusi tumaoti sa fesoasoani i le galuega sa fai i lenei Paeaiga 2016-2021 faapea foi le Paeaiga XV i le 2011-2016. O le fesoasoani tele lea i le Ofisa Suetusi na mafai ai ona siitia vave ma lelei le faatinoga o le galuega faa-Suetusi i le sueina o Matagaluega, poloketi, Faalapopotoga a le Malo ma le faamatalaga aoao o tupe a le Malo. Ia faamanuia le Atua i la outou foi valaauina.

O le fautuaga a le Komiti o Tupe a le Palemene i le tausaga faaletupe sa faaiuina i le aso 30 o Iuni 2019 o lo o faatino ai nei se galuega faapitoa a le Ofisa Suetusi, Matagaluega o Tupe ma le Matagaluega o Tiute ma Tupe Maua. O lea galuega faapitoa o lo o toe iloilo totoa ai aitalafu tuua, aseta ma poloketi sa tauave mai i le tele o tausaga ua mavae.

O lenei galuega sa saunoa manino i ai le Afioga i le Taitaifono o le Komiti o Tupe i lana lauga e le i mamao tele atu. O le faamoemoe e faamaea lenei galuega ia Mati 2021. Lau Afioga i le Fofoga Fetalai, ou te talitonu ua maea se taumafaiga vaivai a le Matagaluega o le Suetusi.

Ae ao lava ona ou faapai atu i le faamatalaga a le Ofisa Tausi Mavaega. E puupuu lava, e puupuu lava se lagona. O le 5 tausaga sa matou galulue ai ma le Afioga ia Leaupepe po o le Afioga foi ia Sala Leaupepe. O se molimau puupuu atu lea i le tulaga alualu i luma ma le siitia o le auaunaga. Ua taoto i se tulaga manino...

**Afioga Faaulusau Rosa Duffy Stowers (Gagaifomauga Nu.3):** Lau Afioga i le Fofoga Fetalai pe maua se avanoa...

**SUI FOFOGA FETALAI:** Malie le sui usufono se i tulai mai le sui usufono tamaitai o le itumalo o Gagaifomauga Nu.3. Masalo ai e i ai se mea taua. Malie lau Afioga i le Minisita se i tuu i ai le avanoa. Saunoa lau Afioga.

**Afioga Faaulusau Rosa Duffy Stowers:** Faafetai i lau Afioga i le Fofoga Fetalai mo lou avanoa. Ia se i fai foi se malologa a le Afioga i le Minisita ua afa itula o saunoa.

A o le i see ese foi le Afioga i le Minisita mai le Suetusi Sili, e fia faapai foi i ai se faamatalaga po o se faamalamalama i lea vaega ona e pei ona malie ai i le saunoaga a le Afioga i le Minisita, ua up to date uma galuega a Matagaluega ma Faalapotopotoga a le Malo. Ma o le Afioga foi i le Palemia faapea le mamalu o le Kapeneta ma Minisita Lagolago, Matagaluega uma lava ma Faalapotopotoga a le Malo, o le taunuuga lea o a latou galuega. Mo le silafia foi lava e Samoa o lo o faafogafoga mai, o i e atagia mai ai i le good governance, ma o se isi foi lea matatia po o se isi vaega lea o aiaiga maualuga e mafai ai ona faamatuu mai e donors po o Faalapotopotoga mai fafo fesoasoani lea e aumai e atiae ai lo tatou atunuu. O se vaega e ese ma le taua ma e momoli ai lau faafetai i le Afioga i le Minisita faapea le Matagaluega o le Ofisa o le Suetusi Sili, aemaise foi lava le vaega lea o le private sector lea e fesoasoani i ai ia i latou o lo o faatinoina lea galuega, o se galuega e ese ma le taua. Ma ua manaia foi le folasaga a le Afioga i le Minisita ua faalogologo atu ai foi i le maualuga o faailoga ua ausia e i latou o alo ma fanau a Samoa, e ave i ai le faatuatuaga a le Faigamalo aua le sailiiliga o galuega o lo o faatinoina. Ma e mitamita ai foi le agaga ma le loto i le taunuuga o galuega nei. E le o faataga faia, e matuai tuu i ai le malosi o le Faigamalo e faatino ai galuega, o lo o i ai i latou o lo o sailiilia po o atoatoa ona faatulaga lelei ma ausia uma aiaiga e tatau ai. Malo faafetai. Ia, o se tala lena ou te iloa o la e ua lava lelei le malologa a le Afioga ia Sala. Malo lava i lau Afioga Sala, oka se manaia o lau lauga. Faafetai.

**SUI FOFOGA FETALAI:** Faafetai. Faafetai mo lou sao faa-tina i le faamoemoe o le Minisita. Ae se i tuu atu le avanoa e tulai mai ai le Afioga i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e i ai nai itu taua ou te tulai atu ai e ave foi le faafetai i le Minisita ma le Matagaluega o lo o i lalo o lana vaaiga. O le itu taua lea e ao ona manino ma malamalama foi i ai le Maota nei, o le isi lea Matagaluega o lo o faatino ai le galulue faatasi o le Malo ma i latou i tua, private sector partner o le Ofisa lea o Suetusi, ona o le tulaga lenei i le taumafai o le

Minisita ma le Matagaluega ina ia vave le faagaoioiga. Ua faamatuu atu ai foi e latou i tua i kamupani o Suetusi faamauiina nisi o galuega latou te faatinoina. A maea ona latou sueina ma tapena a latou lipoti ona aumai loa lea e toe siaki e le Suetusi Sili i le tulaga o le ogatasi o latou suesuega sa fai ma le opinion, professional opinion. O lona uiga o le faaiuga ua fai e Suetusi i tua, tusa o latou findings, po o mea foi na latou tau i ai e moomia ai le toe faaleleia, po o ai lava, po o le Matagaluega po o le Faalapotopotoga. O le va lea galulue faatasi i le tomai lea po o le profession a le Au Suetusi. E faapena foi i le Matagaluega o le Loia Sili, e i ai foi taimi latou te tuuavanoa atu ai i kamupani i tua se vaega o ni Tulafono e moomia ai le latou foi faufautua. O itu ia e iloa ai le mea o le felagolagomai, felagolagomai o le Malo ma le private sector, o latou ia e faaigoa o le engine of growth, e tusa o le enisini lea o le tuputupu ae o le tamaoaiga, aemaise o le faatupulaia o nei mea o galuega. Aua o galuega uma lava e fai e le Malo, e tasi lava le taunuuga, le faamoemoe, o le manulauti, o le fuataualuga, o le ute o faigamea o lo o faatino i totonu o le Malo o galuega mo a tatou fanau. O i e auala atu ai le siitia o le olaga o aiga Samoa. Ma e le gata la i le tulaga o le faamatuu atu i tua, a o le faaataina foi lea o le suesuega e faia e i latou e leai se piitaga mai le Malo. E atili siitia ai lea tulaga o le independent professional audit. E leai se sootaga, o le itu taua lea lau Afioga lea e faaataata mai e le Minisita. E le gata ina faatoateleina le afaigaluega, ae faapea foi ona mafana le faiga paaga e mafai ai ona faamatuu atu i tua nisi o vaega, o suesuega o lo o latou faia e suetusi ua lauiloa ma le faatuatuaina.

I le vaega lea o le Public Trust po o Mavaega, e i ai le tausaga, ua ou le iloa po o le 2 ea leni o tausaga na avatu ai se mafaufauga e faapea. E sili ia ona faatutoatasi lea vaega, faamatuu atu i tua. Soia le toe alai le Malo ma ave fua tupe e faatupe ai ona o le tulaga leni. O le Ofisa lea, e agai tonu lava i puipuiga o i latou ua maliliu, ae o lo o i ai ni a latou aseta, ni fanua po o ni tupe. A maliliu e le i tusia sau mavaega, o ai e alu i ai seleni? O i la i le Ofisa lea, ua i lalo o le Tulafono, o i latou la ia e laa mai loa taofi uma seleni a le tagata lea. E latou te tilotilo i ai ma fai le faasoia tata. Aua o mea faapenei, e masani ona lelei lelei lava fanau, a o soifua matua. Ae feoti uma loa tau loa, tau loa leaga ua ou vaai ai i mea ia i le 2 tausaga puupuu lava sa ou vaaia ai le Ofisa lea, i le tausaga 1975 i le 1976. O le ta o le 2 i le isi aso ae fafagu mai au, fafagu mai au o fanau a matua ua maliliu. O lea e fetauai ia latou uili po o ni fanua po o ni tupe ua faamatuu mai, po o ni faatoaga, ae o lea ua misa, ua misa fanau. O se tulaga faigata tele lea, o ni matua e fealofani ni fanau, a o ola.

Ae manatua la lau Afioga i le Fofoga Fetalai, o lea e mafana i le vaavaai atu a matua. Fai le toa-lua o le tama, vaeluaina lona mafaufau, fai le toa-lua o le teine ua vaeluaina lona mafaufau. Ua amata loa ona vaai le tagata ia ia te ia lava ma lana fanau. A fai la ua lilifa tele le vaai a le toeaina i se

toatasi, i se toatasi o le fanau ona o le galue. E le o iloa i lena, le taimi o le a oti ai a o lea ua amata ona mumumumu taitoalua, vaai lou matavalea lena o le a ave e lou uso matua ia mea uma a ou matua. Ae faapefea oe ma le ta fanau? Tupu loa le feitagai. O le ala lena na fai ai e papalagi le mea lea o le uili. E faasoa lelei ai e matua mea ia ae le i feoti. Ina ia maua pea, e faatumau le fealofani i fanau. O isi aiga, e na o lenei lava kuata eka, ae ua faaauau ai lava le misa, ae na o se kuata eka lava, misa, misa leaga. Sa leai se misa a o soifua matua. O le uiga o le faaupuga, outou uma lava nei o le Palemene lenei ma latou o faalogologo mai, a e vaai atu loa o le a lata mai le valaau a le Atua, vaai lau fanau, vaai ma au aseta ae fai le uili. Faasoasoa lelei ae te le i oti leaga e te oti loa fetuiai loa.

E i ai le toeaina e masani ona sau ia te au, o le toeaina Siumu. E tele ana mea, faleoloa ma le papovi. O mea uma lava a le toeaina e fai e manao lava ou te alu atu ma talatalanoa foi faapea. Na fesili mai ia te au, ave i ai lau fautuaga, a o le faalavelave. O la e manatu e le i taitai mai ona valaau mai le Atua te i lava ua uma faafuasei. Sa ou i ai i lona maliu, matau lava lea o mea, o le manaia ia o le faiga o lona maliu. E 3 masina ae toe fesili atu i le alii lea e vaaia, o a mai si outou aiga? Oi o matou ua malepe, malepe i i, i le mea lea.

O le function, o le galuega atoa lena a le Public Trust, o le tulai mai e faamaopopo uma aseta a matua, ona totogi muamua loa lea o aitalafu. Ina ua uma lelei lava ona totogi aitalafu, ina ia sao ai lou agaga i le lagi. Aua a leai ni au aitalafu, e tietie uma i lou agaga. O la e manino lelei lava i le Tusi Paia, o au agasala uma lava mea na, o lou nofo aitalafu. E i ai le isi toeaina na ou fesili i ai, a lea ua ou vaai atu ua e matua, i i, i le nofoa la e tuu mai o, i le taimi faatoa ou sau ai i le Palemene. O fai ni au aitalafu? Ae fia? Na fai mai le toeaina, Tui, a e nofo ma value, vaai uma lava aseta e mai le uati e tau mai i inei, pe fia miliona. E le taitai oo i le mea lea, au aitalafu lea e i ai. A ou oti, faitalia ai tamaiti. Ae pau lava le mea ou te faanoanoa ai, o lou oti ae ou alu atu i luga, ae fai mai Peteru. O i ai ni au aitalafu? E leai. E matua e valea tele, e tuu atu foi le lalolagi e te pule ai ae faavalevlea faapena, ona ma talie lava lea. Ina ua oti le toeaina lea, ae ou faalogo atu oka oka le mea o aitalafu, noatia ai ma ana aseta.

E i ai le taimi na oo mai ai le isi loomatua, ua tau le aiga, ae ua ta ea le 3 i le vaveao. Ou faapea, alu e faatali mai o le a ou alu atu. Na ou nofonono lelei lava lea ma ou mafaufau, ou tilotilo i si ou toalua ma si au fanau. Ou faapea, auouo... a te i ua ou alu atu nei i le pogisa, ou oti atu ai ma au, e ono faapea isi e o atu i lou oti, ua lelei ua ou oti. Ae la e oti o le faavalevlea, e vaai ane lava e pogisa le mea ae alu lava e tau fofo. Sa tatau ona faaoga lou mafaufau. Ona ou faapea lea, ae se i malama. Ona ou moe lelei lava lea, malama loa le taeao ou alu. Ou te alu atu, o la e tau fai tutu uma mai, o uso ma tuafafine ma agaese i le isi itu ma le isi itu. Ou tilotilo atu, ou te lavea ai i, ou alu atu lava alu sao lau taavale i tai, ou toe tu, ou

toe sau lelei lava ou alu i lou Ofisa valaau mai loa e o atu. E o atu, a o lea foi ua i ai ma leoleo i ou autafa. O le faaaoga o le common sense, faaaoga le common sense i le faatinoga o tatou galuega. O lea la ou te fai ma ou vaavaai i le Public Trustee lea e i ai nei, ua ou vaai atu ua lelei lava lona health. Ona ou faapea, a tasi la lea tagata o lea e faaaoga lona common sense. O i, e toatele naunau public trustee ua oo i ai. O le alu alu lava ou vaai atu ua tinovale atu lea, aua e te faafeagai pea ma tagata e omai, e omai ia te oe mo se fautua, ma se taumafaiga ina ia fofo le mataupu lea.

O nei, o le toatele ia o tagata ia e nonofo lisi i Apia, o la e faapea latou o ni latou fanua. Ae o lea faatoa iloaina nei, o le fanua o le isi aiga na oti lava le latou tama i le 1890, e le mafai la ona faasoa e le Public Trust seiloga e maua uma mai le vaega lea. Ona ave loa lea o faasalalauga i Amerika, Ausetalia ma Europa, a le maua mai ai la, e nofonofo ai lava. O le mea e tatau ona fai, vave ona complete le administration. Ia vave ona fai, ina ia mafai ai ona maua e latou ia e soifua pea. E i ai le isi toeaina na fai lana uili, a o le faalavelave ua nofo ma faasoa a o lea e ola. O le faalavelave la, o lana favor lava lea ua tuu i ai le mea aupito lelei lava i lona manatu o le a tausi lelei e le atalii. A o le faalavelave, o le atalii e fiafia tele e alu e gamble i mea ia o tuuga solofanua ma isi foi gamble. Na alu alu lava uma, sau loa i le RSA inu ai, inu ai loa i ina ma pisapisa ai lava. Ua ona nei, fai mai loa, oh... matautia lenei mea, o lou nofo ma faasoa ia aseta i lau fanau a o lea lava ou te ola. O lea ua avatu nei le mea e aupito sili ona lelei i lau pele. A o le a le mea ua fai e lau pele? Na alu lava faatau tiai le aseta lea, a o la ou te ola. O le a la le mea na fai? Na o tuuga solofanua lava ana mea na fai ma petipetiga, alu uma lava i le 3 tausaga, a o lea lava e le i oti le toeaina. Lau Afioga i le Fofoga Fetalai, e taua tele le galuega lea e fai e latou. O le ala lenei na toe fai ai le iuga a le Kapeneta e leai, faaauau pea, o le tautua lea o lea e fai e le Malo. Ia ave pea tupe e faagaoioi ai, mo aiga ua mafatia, valaau le Atua i le tama, a o lea e i ai galuega e tatau ona faatino. Aua a e oti e leai sau galuega, o le Tulafono la e i ai. A i ai le toalua ma le fanau, e ave e le toalua le isi vaega, ae ave e le fanau le isi vaega. O le 1/3 ma le 2/3, ae a faapea e na o tamaiti, e faasoa tutusa lava. Pe a faapea lea e te oti ae leai sau uili na faia, ona take over loa lea e latou i lalo o le Tulafono.

Lau Afioga i le Fofoga Fetalai, a na leai la le tautua lea e fai e le Malo, ona tauave loa lea e loia, o le mea la lenei o lea e tupu. E sue atu tupe e isi, ua chow uma e le loia. O le ala lenei, o lea na fai ai le tatou Tulafono e sue le au suetusi ia tusi a loia mo teugatupe faamavaega. O Niu Sila e faa-tolu na sue i le tausaga, e tau mai ai i ina, le matautia o mea nei o loia pe a oo i Trust Accounts. O i inei e avatu le Tulafono, ae aumai toe tasi le tausaga, o le isi la lenei Tulafono ua tatau ona toe teuteu, e faa-tolu ona sue i le tausaga. E faa-tolu ona sue i le tausaga ona ou te masalosalo, o le mea lenei o lea ou te vaai atu i isi loia, le vaega lea e te iloa lelei lava o la e taaalo. E



tatau ona matua tuutuu loloto le faatuatuaga, ae tasi lava le mea e amiotonu ai le loia lea e vaaia le Trust Accounts, o le o atu o suetusi e sue po o le faa-lua po o le faa-tolu i le tausaga e pei ona fai e Niu Sila. O le ala lena e sosola mai ai isi loia, ua maua i le tulimanu. Ona sau loa lea faifai mea leaga iinei. Lau Afioga i le Fofoga Fetalai, o le auau atoa lena o le mataupu lenei. A o lea ua ou fesoasoani atu, ona o lea ua ou tau vaai atu ua tau eeva le Minisita, a o lou taugamalosi lea. O le fesoasoani atu lena e faalatele le mataupu lea.

**SUI FOFOGA FETALAI:** Ia saunoa lau Afioga i le sui mamalu.

**Tofa Hon Lauofo Fonotoe Nuafesili Pierre Lauofo (Anoamaa Sisifo):** O lea ou te vaai atu i le Afioga i le Minisita e le i lava lana malologa. E leai, e saolele lava le saunoaga a le Afioga i le Palemia i isi Vaega ona e pei o lea sa taua nai loia. E i ai foi le vaega lena sa sese ma sasi lea e pei ona saunoa le Afioga i le Palemia. E le na o latou sa galulue i Niu Sila, sa i ai foi i latou sa galulue iinei na sasi foi i mea faapea. Ae ua taua la le mea lena o le sese, o le tele o isi mea o le faaupuga o pepa ma mea faapena. Ae o le mea lea o le chow, leaga o lea sa saunoa le Palemia e faapea ua chow e loia. O au o lea ou te tau mafaufau po o le a le uiga o le upu chaw. E pei lava o se upu faa-Saina ea. A fai o le chow faa-Saina o le taumafa, pe o le ai lea o tupe. Ia, ou te le iloa pe faafefea ona fai lea mea e se tagata soifua. Ae masalo o le tulaga foi lea o le faaogasese o se tupe.

Ae manatua foi, o lea na pasia le tatou Tulafono e le i leva tele atu. E siaki ai Trust Accounts ia sa taua e le Palemia a loia. Ae o lea ou te nofo ma ou toe mafaufau i tua, masalo pe i e leai lava se loia o falepuipui, a o le toatele ia o le au suetusi lea e i uta i le falepuipui i le mea la lea, i le amio la lea o le chow. Over to you Mister.

**SUI FOFOGA FETALAI:** E le iloa po o le chow o le faaumiga o le chow mein. Saunoa lau Afioga i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e masalo e le i maua mai e le sui usufono mamalu o le loia. Sa faapitoa lava mo latou o lo o faia le mea. Ae te le o toe aafia ai, o lea ua e i totonu o le Palemene. A e sau loa i totonu, e le toe faia ni au pisinisi. O le leaga foi lea o le tele o gagana e te malamalama ai, e pei o le gagana faa-Saina. Ae o le mea lea na ou talanoa atu ai, e le o le chao o le chow, o le mea foi lele o le....

**SUI FOFOGA FETALAI:** Aua e i ai lou pito i le mea lea e saunoa i ai. Se i saunoa mai lau Afioga i le Minisita o Galuega Tetele aua e malamalama i mea ia.

**Susuga Hon Papaliitele Niko Lee Hang:** Ia faafetai i lau Afioga i le Fofoga Fetalai mo le avanoa. E leai ou te le malamalama i mea ia e talanoa ai le aualii ia, o le chao ea ma le chow. O lea ou te tulai atu leaga o lea ua saunoa mai le loia, e na o matou lea e falepuipui le au accountants. E leaga e matuia le lafoga, atonu tatou te le iloa po o i ai ni accountant o falepuipui. Ae mo le silafia, e pau lava lea o le accountant muamua lava, na sau vaai le Public Trust Office. E ese mai loia sa i ai, loia loia loia, accountant loa toe loia toe loia. Ae o le mea na lelei ai le accountant, maopoopo lelei tupe a le Public Trust. O le tala na a matou ia o accountants.

**SUI FOFOGA FETALAI:** O lea la ua manino auofala. O lea la o le a fai fefinauaiga a accountant ma loia. Ae se i saunoa le sui usufono mamalu o tulai mai.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, o le mea e fia faamanino, ou te le i taua se falepuipui lea ua saunoa i ai le Afioga a le Minisita. A fai la, o lona uiga la o la e silafia e le Afioga a le Minisita le tulaga o i ai. E pei o mea lena, aua o loia ia e le tusitusia ni fuainumera, e pei la o si vaega lea, le profession lea. E lelei lava latou i le faamaumau o fuainumera ma tulaga faapena. E ai lava le isi taimi e pei e pio ai le oosiga o le peni, e faapea oe, ai o se 2, a o le 7. Ua tele atu le fuainumera, e pei e faapena. O le aoga foi lena o okika, e siaki lelei a tatou faamaumauga. Ae leai lau Afioga i le Minisita e pei e faapena.

**SUI FOFOGA FETALAI:** Faafetai mo saunoaga i le mataupu lea. Ua ou faatagaina ona e tele lona taua mo le faafofoga a le atunuu, aemaise ai le tausiga o aseta, aiga taitasi. E faaataata lafoga le saunoaga a le Taitai o le Maota, a o le taua ia i le faafofoga a le Maota ma le atunuu. O le ala lea o le talatala pea o le mataupu. E i ai le lagona, lau Afioga i le Minisita o le Public Trust, ou te talitonu lea ua maea atoa le faamaninoina o lea foi tautua mo le mamalu o le atunuu. Ae seivagana ua i ai se isi mea e te fia faaopoopo i ai, a o le agaga faafetai i le Taitai o le Malo, o lea ua na faamanino uma tulaga uma, e ao ona silasila i ai. E manino foi le Nofoa leaga e masani ona matou feiloai ma le Ofisa lea, i le matou Komiti. E faamanino uma ai tulaga uma o mea ia o uili ma aseta e tataua ona lelei lona faatinoina. Ae peitai o lea ua manino lelei i le faafofoga a le atunuu, ia e le toe oo i ai se faamatatalaga. Ae tuu atu pea le avanoa i lau Afioga i le Minisita.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga e toe tasi lava si mataupu lea. Ua ou toe manatua nei e taua tele mo le faafogafoga mai a le atunuu. Ona o o au e agai atu i ai mataupu ia, pe afai ua siliga taliiseu se tali a le Public Trust a le Ofisa o Tausi Mavaega. Ae o le taua o le itu lea, e maliu loa se tagata, o ana tupe uma lava o i ai e le mafai ona toe avea i tua, ae alu i o i le Ofisa o Mavaega. O le Tulafono lene. O le aoga la o le mataupu lea ua lagalaga, e manino ai i le faafogafoga mai a Samoa, le tulaga faigata e faafeagai ma le Ofisa lea o le Tausi Mavaega, leaga o le latou tiute lea. E te oti loa o i ai sau teugatupe, e alu atu lou toalua e tala mai ua taofi. Po o fea lava le faletupe e i ai, e taofi, ae alu loa i o i le Ofisa o Tausi Mavaega. O le mafuaaga, e tilotilo le Ofisa o Mavaega, o i ai le faasalalauga e fai. Pe i ai ni tagata sa nofo aitalafu ai. O lana galuega la, o le totogi muamua o tagata na, a o le a le tupe e totoe, faatoa faasoa loa lea. O le tele o mataupu faapenei e oo atu ai le tatou atunuu ia te au. E ui lava o la ua foi mai o i le Ofisa o Mavaega, ae ua toe omai foi ia te au, i le manatu foi lele, o lea e ia te au le power. E mafai ai ona ou faatonuina e fai se faiga e le talafeagai ma le Tulafono. O le a la le mea e fai ai? Ia sau e toe ave le tusi lea i o, se i silasila ane lava, o le tusi. Se i silasila ane lava i le mataupu a si loomatua lea pe talafeagai ma le Tulafono, e pau lava lene o lau faasilasilaga pe talafeagai ma le Tulafono. E i ai la taimi e ave ai foi lau tusi faapena i le Faletupe o Atinae. E silasila pe talafeagai ma le Tulafono, e faapena foi ma le NPF, e silasila pe talafeagai ma le Tulafono. Ou te le o fai atu, e talepe le Tulafono, e pau lava le mea, pe talafeagai. O ai la e faia le iuga? E pau ia te ia le iuga. A fai la e nofo ma fai se iuga sese, e le o au la e sese. O le tagata faigaluega ua le faia lona tiute. O le aoga lene o le tatou felafolafoaiga, o lea ua faafogafoga mai le atunuu. E te fiu e te sau ia te au, po o Sala, e le mafai lava ona faalava i i, i le pule a le Public Trustee. E na o ia o la e i ai le pule faale-Tulafono.

O le vaega lua, ma o le mea lea ua tupu soo lava, o le mai o le tamaloa lea e faigaluega, ma o le mai lava e oti ai. Ona talanoa atu lea o le toalua, o le a le tulaga pe a uma lou soifua a o la e i ai le ta NPF, se i maua lou malosi ona ou alu lea e siaki. A o le mea la e tusi i totonu o le NPF i le 30 tausaga talu ai, i le taimi lene e le i faia le toalua. E na o lona tina ua oti, ma lona uso la e i o i Niu Sila, o la e tusi ai. A o le taimi lene, a ou oti, ona ave lea ia Simi o lou uso, ia oti loa, ae \$30,000 le mea lea. Sau loa i le NPF, ae sau le fafine, e le mafai ona ia tala, o la e ia Simi, a o Simi la e i o i Niu Sila. E tusi atu ia Simi, ae fai mai Simi e le mafai. Ua ese foi le taimi lea ua i ai, o la ua fai le toalua o Simi. Ma o la foi ua fai lana ia fanau, o la foi ua tele ana aitalafu. Ia, na o le aleluia lava ma faapea ane, talofa e, i si ou uso ou te le iloa o le a sau nei faamanuiaga. Ae a faapefea le tina ma le toa-sefulu lea. E leai ma se mea e maua. O le tulaga lene e taua, e taua foi mo i tatou.

E taua mo le afaigaluega lea e faalogologo mai. A fai na fai lau tautinoga i le 30 tausaga talu ai, faatoa amata, a o lea ua maualuga. Ia toe siaki po o ai la ua tusi i ai lau NPF, toe siaki po o ai. Po o tusi i lou uso la e i o i Amerika, o lea ua leaga ma oe ma le loomatua, e atili ai lava ona le maua e le loomatua se mea pe a e oti.

Lau Afioga i le Fofoga Fetalai, e aoga tatou faatalanoaga ia masalo pe oo atu taeao ua tumutumu atu nisi taeao, talu ai la tatou Fonotaga lenei. Lau Afioga i le Fofoga Fetalai, e taua tele mataupu ia e laga, e le Afioga i le Minisita.

**SUI FOFOGA FETALAI:** Ua matau atu e le Nofoa, ua tau fai faamau uma e alii ma tamaitai o le Maota, le tulaga o le taua o le saunoaga a le Taitai o le Maota. Se i tulai mai lau Afioga i le Minisita.

**Afioga Hon SALA FATA PINATI:** Ou te faafetai i le Afioga i le Palemia. O se avega tele lea sa ia te au, a o lea ua faamamaavega, ua uma foi i i le folasaga a le matou Ofisa Tausi Mavaega. Aua o le mea moni lava ia, o a ni mea a ou toe tautala i ai, o lea ua aumai moni e le Palemia, le Afioga i le Taitai le tulaga lea. Ma o le mea tautino lava lea na tupu, na avatu le tusi, e manao e privatise le lala lea, le Tausi Mavaega. E tatau ona tatou faafetai, faafetai e i ai le Taitai alofa, meamanu le Taitai le Afioga i le Palemia. Se meaane e taaalo loa i le totogiga o loa foi ia, i pili a aiga foi ia, o le a faapena ona faaletonu a latou meatotino.

Lau Afioga ma le paia o le Maota, ua maea se tautalaga i le vaega lea, ua manino atoatoa. Ae pau lava le fautuaga ma se tuualalo mo lo outou silafia, e ao ona fai sau uili. Ia fai sau uili, ona maea ai lea o le popole ma le lē tagolima o le tina ma le fanau.

Lau Afioga e toe tasi lava le vaega o le Matagaluega e le i oo i ai, o le WESTEC. E puupuu foi, e puupuu foi, ona faaiu atu ai lea i sau faafetai i le Palemia, le Maota nei, ma si ou itumalo, pe a ma se afa itula ona maea lea. Sauni mai si ou uso, the man Papalii.

**SUI FOFOGA FETALAI:** A maea uma lava oulua i le afiafi nei, ua manaia lea.

**Afioga Hon SALA FATA PINATI:** O le STEC na filifilia ai le Afioga ia Fiamē na te tauaveina i le Paeaiga lenei. Peitai ane, talu ai ona ua toe reshuffle le Kapeneta, o lea na aumai ai loa le Faalapotopotoga a le STEC ou te vaai. Ma o le mea ou te faafetai ai, ou te faafetaia le galue o le Afioga po o le Ofisa Sili ia Patea. Oi se talofa, sorry brother, ua avea le popole ma mea ua galo ai. Leai e le faagaloina oe. O le taitaiga la a Patea, o lea e fua ai fua lelei nei. Ma o le mea moni lava ia, o le tasi lenei Faalapotopotoga a le Malo sa i ai le faitau a le atunuu it's a ting foi lele, o

tupe uma lava e avatu i ai, e avatu lava ma le iloa e taaalo ai le tele o tagata e faaaogasese, e tele naua tupe ua faaaoga le tatau, ua pule ai lava le tagata ia. Ae a nei? Faafetai. A lea ua molimau le Suetusi Sili, a outou Afioga o lea ua i lalo o le Malo i le faavae o tatou i pulega lelei, ma ua tupu foi. E alu le tupe e saili le tupe, ua i ai fuafuaga ma ua tino. Ua i ai le biomass i Mulifanua, maua mai ai le eletise fou. E i ai le township o le a faatino i Mulifanua feagai ma le uafu ma le Sheraton, pe a ma le 300 eka o le a faatino ai i le faamoemoe lea, le township lea. Mo se faataitaiga, ne i mea nei ua alu alu tatou toe fai atu i se mea e fai ai sau pisinisi i lea vaega o le atunuu a ua pea mai ua tuai. E fai sau tala o i i le vaega lea i Vaitele. Sa faapea ona faatau mai e le Afioga ia Suivai le tele o fanua i ina, sa faatau ai la ou fanua ae ua ou toe faamaamulu lava, e 5 eka. Ma lou lava mautinoa ma le mafaufau, e leai ni tagata e nonofo ai i lea vaitau. Ua a nei? Masalo po ua \$100,000 le tau o le kuata eka i le vaega lea. A o aso na, e maua i le \$2,000+, na o le \$2,000 lava le tau sa i ai le tau o le fanua. Se i vaai i lou faavalevalea. Ua ou toe tui tino.

Ona faapea lea o se lagona e fai atu i le itu lea, lea itu o le motu. E 300 eka lea ua fuafuaina e fai ai le township lea a le tatou Malo. Ma e i ai le talitonuga, o mea e tupu mai i tupuga lelei e manuia foi, aua foi o le ala lea na ala ai ona tatou omai. O tatou tatou te puipui aseta a le atunuu, tatou te taumafai e fai mea silisili aua le lumanai o e le i fai mai, e le i feola mai. O le fesili a, na i ai se aoga o lou tama po o lou tina i le atinaeina o le Malo o le atunuu? E pei o le fesili taua lene, o se fesili e tatau ia i tatou uma ona tatou moemanatunatu i ai. Ia amuia lava i tatou, amuia oe lea ua tofia, ua filifilia mai oe e lou itumalo e fai oe ma leo o le itumalo, fofoga, mata, taliga o le itumalo. O oe o le leo. A lea ua tatou saofafai i upufai o Malo. O ai na manatu ta te oo mai i i? E leai. Tatou te faafetaia le Atua Silisili Ese, aua o mea tatou te faia nei, e molimau ai taeao. O mea leaga tatou te faia nei, e molimau ai foi taeao. Ioe. A o le upu moni, e tupu mea ua faatino e le WESTEC. O lo o i ai le business hub i Aukilani ua alu ai se vaegatupe pe a ma le \$1 miliona tala, uma ona faatauina ma ua pasia e le Kapeneta, ma ua i ai foi le Komiti Faafaoe o le tatou atunuu o lo o faapea ona pulea lea vaega o aseta a le atunuu. O le aseta o le aseta a le atunuu, e le o se aseta tau ia Patea ma au ma le WESTEC. O aseta a outou, o a tou meatotino ia. Samoa, o mea ia o meatotino a outou. Aua ne i i ai le faitau faapea o le HRPP e ana mea la. E leai. Ia o tatou manatu, e te faia mea silisili mo ou tagata. O tatou ua na o ni auauna, o ni auauna faatauvaavaa lea.

Lau Afioga i le Fofoga Fetalai, ou te manatu ua maea se sao...

**SUI FOFOGA FETALAI:** Malie lau Afioga i le Minisita se i tuu atu le avanoa i le sui usufono mo Faleata Sisifo.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai, faafetai lava mo le avanoa. Faafetai foi i le Afioga i le Minisita. Ua ou iloa tasi lea Matagaluega na ou sau lava i le Palemene o iloilo e le Malo le mea e tuu i ai le STEC, pe tuu i tua, pe faaaau pe tuu i lalo o se isi Matagaluega a le Malo. E tai tutusa lava ma le Public Trust. Ae momoli lau faafetai i le Afioga i le Minisita ma le Kapeneta ua toe taofi le Matagaluega lenei. E tasi lenei aseta aupito sili ona taua o lo o i aao o le Malo, e ova i le 6,000 eka le fanua tele lea. Ae o lau matau foi, ua faa-3 ona upgrade ma faaleleia le malae vaalele i Faleolo ua faaaoga mai ai maa foi ia o le vilimaa lea e i uta a le STEC.

O lea la ou te fesili atu i le Afioga i le Minisita pe le i i ai se fuafuaga a le tatou Matagaluega lea e fai loa se vilimaa tumau i uta i i le mea lea, aua ua tele ina eli pu solo le tele o Samoa ae tele le fanua lea lea e mafai ona taofi se 100 eka pe fia e matua fai ai se vilimaa lelei a le Malo aua e le uma ana galuega, aemaise o le tele o le atinae, o le uafu, o le malae vaalele ma le taulaga lea e fofou i i le vaega lea. Ae po o le a foi se tulaga o i ai le tatou power lea na fai talu ai nei, e mafai foi ona faaaoga i ai le vilimaa lea. Ae faafetai tele lava, o lau fesili lea lau Afioga i le Minisita.

Ae pau le mea sa ou fia tulai atu ai aneleila lau Afioga aua o lea sa tusi mai le aao o le Palemia ia te au o lea ou te nofo atu i i le mea lea o le public trust foi lea o le uili. Leaga o lea e afio mai le Afioga i le Public Trustee, e faa-2 ona ou oo i ai i lau uili, ae le taliaina lau uili. Ioe. Ou fai atu, o le a le mea o le a le talia ai lau uili? Fai lau uili, o lou toalua ma lau fanau e toa-3, e vaevae i ai au aitalafu. O le mea moni lau tala. O le a le manatu o oe, faaaoga, tausi, faatafafao, ave i ai fanua ma mea ae leai se... o le taimi lenei, vaevae i ai aitalafu. E ala ona tele le pisa o tagata nei o le ave i ai o mea pe a ola ae, ae a ave i ai aitalafu, ailoga e fia pisa?

O le ala lea lau Afioga i le Minisita ma le faafofoga mai foi a le Public Trustee lea ua faa-2 ona ma talanoa i ai, fai se auala, vaai se auala e fai i ai. Aua o lea ua faafofoga mai si au fanau ma si ou toalua, o aitalafu lava mea tou te faafesagai. Ia faafetai lava.

**SUI FOFOGA FETALAI:** Ia se i tulai mai le Afioga i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, leaga e faigata mea ia. O le tulaga lena, pei lava ou te vaai atu o se uili faa-polokiki. Na o le pau la le tagata sa tatau ona e agai i ai, sa tatau ona e agai ia Sala. O le mea la lena e le oo i ai le matata a le Public Trustee, o le mea o le uili faa-polokiki, e faasoia muamua au aitalafu mo i latou.

Ae lau Afioga i le Fofoga Fetalai, i le mea lava lea o le uili, o le isi lea tulaga taua, e mafai lava ona 100 au uili e fai. Aua o le uiga lena, tusi le isi uili, toe tusi. A o le uili pito sili ona taua, o le uili faaiu. O le mea lena e nonofo ai isi faipisinisi ma tusi le uili, ona faaaliali lea i le toalua, ae alu atu le toalua o le a tala, ae alu atu e ese le isi uili lea. O le uili la e mulimuli lava, o le uili lena e faaaoga. Ae o le mea taua foi, ia tusia e se Loia e le tau ia oe ma se witness e le tau foi ia te oe, leaga e ala ona puipui i mea ia, ina ia aua lava ne i i ai ni mea piopio e tulai mai.

Lau Afioga i le Fofoga Fetalai, e i ai le itu taua lea sa laga e le Minisita mea ia o le township sa faa-Peretania. O le uiga tonu o le taulaga. Ma o mea ia e masani ona fai e Mal oi le atiaeina o lea vaega o le atunuu ma lea vaega o le atunuu. O le itu taua la i i, ona e faapea lava le uiga o mea. E faatu ai le taulaga i eleele e pito tulata ma le isi motu. E pei la ona silafia o lea e i ai le taulaga ua amatalia i o i Salelologa, o le faitotoa lea o le ulufale ma le ulufafo i le motu tele. Ia pe alu alu foi ni tausaga fai foi se taulaga faapena i o i Asau. O le ala foi la lena e fai ai le taulaga i i, o le isi lea auala e fai e Malo mo le atinae tutusa o vaega eseese o le atunuu. O lea la e taua ai leaga e tele le taua o i i le tulaga o tagata foi ia e fia malaga i Savaii pe usu i le taeao, e tatau ona i ai ni faletalimalo i ina e malolo ai. Ia ma le omai foi mai Savaii ua le lelei le taimi, ia malolo foi i ina usu mai ai i le taeao. Aemaise la o ni faleoloa tetele e faatuina i i e mafai ona aveva ma laumua o le la vaega tau lava i o i Falelatai.

O le tulaga la lena e vaavaai i ai atunuu i le vaavaaiga mamao, o le mea foi la lena e taua ai le atinae o se township po o se taulaga e tu i i i le atu Aleipata e faafeagai tonu ma Tutuila. Ona mo le lumanai, o Malo nei, o Malo e ese le Malo o Tutuila ese foi le tatou Malo. Ma afai ae fausia se fautuaga i le Malo o Amerika e sifi mai sina uafu e taula ai tatou vaa i i i Leone, e alu atu sao lava le tatou vaa i Aleipata taula i i i Leone, pe na o le tasi ma le afa itula le umi pe a saosaoa le vaa. Nai lo le mea lea e tupu nei o le alu atu mamao i Apia, e alu atu tau i Tutuila toe taamilo toe mamao le alu i o i Tafuna. O fuafuaga uma lava ia o lea e faataoto mo le agai atu i le lumanai, ae taua ai le fai foi o se township po o se taulaga i Aleipata foi latou. O lea la ua amata fuafuaga o na mea i le tulaga o le malae vaalele ua i ai, ia faapea foi ma le uafu e tatau ona toe faaleleia, o la e foi ua i ai ma le tatou malosi faa-eletise e alu i le matagi.

Lau Afioga i le Fofoga Fetalai, o lea ua amata faataoto atu e le Faigamalo lea le tulaga o le atiae o vaega o le atunuu. O le itu lea e amata ona atiae vaega tetele nei o le atunuu aua le agai atu i le lumanai ma le tuputupu ae pea o le faitauaofai i lea vaega o le atunuu ma lea vaega o le atunuu ona o lea ua tatou vaai mamao i le lumanai ma le ono televave o le tupu pea i luga o feafaatauaiga ma femalagaiga, e le gata o le va o Savaii ma Upolu, ae o le va o Upolu faapea foi ma Tutuila.

Lau Afioga i le Fofoga Fetalai, o le vaai mamao lena a le Malo.

**SUI FOFOGA FETALAI:** Malo saunoa i lau Afioga, o lea ua faafofoga foi le matou motu i Salafai faapea foi le atu Aleipata i le taua o fuafuaga alualumamao a si o tatou Malo. Faafetai tele.

Ou te tapa lau Afioga i le Minisita e faaauau lau saunoaga.

**Afioga Hon SALA FATA PINATI:** E ia te au le ava ma le faaaloalo ou te faafetaia ai le Afioga i le Palemia e tusa ai ma le faamalamalamaga o ia vaega e pei ona i ai le tatou afiafi.

Sa saunoa Lealailepule, e i ai le manatu o lea ua taoto lava i tulaga i le agatonu le faamoemoe i le vilimaa lea ua uma ona pasia. Ua uma ona pasia e le Board of Directors le vilimaa. O le auga ma le faamoemoe ia pau lava lea o le vilimaa i totonu o le atunuu e tataua ona faatau mai ai le maa, aua le fauina o auala ma tulaga uma e moomia ai maa vili ia. E tele le vaegatupe na alu ai, ae o le tau foi o le a faatau atu ai i le atunuu le maa, e taugofie. E tele le taugofie e eseese ai ma le tele o vilimaa lea o lo o i totonu o le atunuu. Lau Afioga Lealailepule, masalo o le tulaga lea pei ona e fesiligia i lea vaega, ae faafetai o lea ua matuu atu lea vaega i le suavai ma lea faamoemoe, ia ua taunuu lava i se taunuuga lelei le tatou feutagaiga foi ma le tulaga ua taatia ai lea vaega.

Lau Afioga, e ao lava ona ou faapea atu, faafetai. Faafetai i le tuuavana, ua lagona se leo o lenei auaua faatauavaa faatauavaa lava. Ae ao foi ona ou faapea atu, aumaia le avanoa se i avatu ai se faafetai, faafetai i le Afioga i le Palemia, ona faapea lea ona faasolo atu ai seia oo i lou itumalo ma ou faamavae atu ai i lenei Paeaiga. Ioe. Aua ou te le iloa pe ou te toe sau, pe pule le Atua ia te au, aua o lou soifua ma so matou ola, e puleesea i tatou. O le palota, o le mea a le tagata, a o le ola, o le Atua lava e pule. O le atoatoaga lena o mea uma, o le tatou faatuatua e ave, po o le a lava, a ia oo mai lava le valaau a o e faapea ifo lava, sa ou faia le galuega i le atoatoa ma ua faamalieina le finagalo o le Atua i se auaua le auau, ia ona ua pau lava o se mea ua oo i ai le taumafaiga a la outou auaua.

Lau Afioga i le Taitai o le Maota po o le Palemia, o lau pule lea, faafetai i lou faaeaea i lou tofia o au o se Minisita i nei Paeaiga e 2. Ua e le silasila i sou vaivai ma le le agavaa, a ua e faaoga le tagata ina ia aoga ma ia tautua mo le Malo. Ou te faafetaia le Atua ona o le masani na ia foaiina mo oe o lou faatuatua ma lou lotonuu, o lou soifua talitonu ma le faatuatua e te faamuamua le Atua. Ua puna faamagavai mai ai faamanuiaga mo Samoa. E tapisa lou lumafale ma tuuaia oe, ae e te le fefe pe e te solomuli, ua e tapena faafafine toaga Samoa mo a taeao ma e manatua pea oe e Samoa, nei ma aso uma. E faaaloologia foi oe mo a taeao. E faapea le upu, “O se au ma le Alii, o ai se faasagatau mai?”

Ou uso a Minisita o le Kapeneta, e mama le avega sii o a tatou avega ona o lo tatou tausoa faatasi. Faafetai tautua Malo.



Lau Afioga Tuitama, Dr. Talalelei Tuitama, oka oka, o le a misi oe, i taimi tele ta te tausua ai ma tatou talatalanoa. Talofa e, e faagalogata le tatou mafutaga. Faafetai Tuitama, o oe o se poutu, o le tofa sinasina, o ou tomai ma agavaa sa e tautua ai i le Malo. Faafetai. O oe sa faalagolago i ai le Palemia ma le Kapeneta. Faafetai i le aga faatamalii. Tau ina faamanuia le Atua i lau Afioga faapea le faletua ma le nofo a alo.

Minisita Lagolago ma sui usufono o le Maota nei, e momoli atu le faafetai i la outou tofa ma lo outou faasoa i a tatou galuega ma upufai aua le Maota lenei. Faafetai le fautua, faafetai le tautua.

I le Afioga i le Ofisa Sili o Pulega ma le Matagaluega o Tagata Tafafao Maimoa Mai Fafu, aemaise le Suetusi Sili, Ofisa Tausi Mavaega ma le STEC, faafetai i le galulue, faafetai le onosai i lenei 5 tausaga sa o tatou galulue ai. O se fautuaga, a o se ote, ia ou te le ote atu lava i tatou Matagaluega. O le agaga ia tatou faia mea silisili mo le atunuu e ala i la outou tautua Malo. Ia faamanuia mai le Atua. E faapea foi Ofisa Sili o Pulega ma tagata faigaluega uma a le Malo, faafetai faafetai, o la outou pule lea le galulue.

Lau Afioga i le Fofoga Fetalai, e fia faaleo le faafetai i le tapuaiga a si ou itumalo o Gagaemaug Nu.1 po o Sagaga 3 e pei ona i ai si ou nuu. Lou nuu e Leauvaa, le paia i le faauluuluga o le Aiga Sa Tuala, o le Aiga Faalagilagi, le afifio o Tuala ma Sala ma le Maopu, le tulaga o Aiga ma Aiga, le Falesefulu ma le Falevalu, ae alaatai lo oulua Toalua Tevaga ma Vaifale ma le mamalu ia Salemuliaga, ma le faleupolu o tofiga a le Tupu. O la outou faaeaea ma le taputapu, ua ae ai i fanua faiva o la outou tofi sui usufono faapea foi le Minisita o le tatou Malo. O upu moni ma upu tautino, e le faigofie mo au lou valaauina, e le i faigofie, e ala i lau pule ua to mo au. O la outou pule lea ua ou tu ai nei i taumeasina nei, ua ou tepa i le matagofie o lau faaaloalo Tuala ma Sala. O lau faaaloalo foi ua ou tu ai nei i Tiafau, ua ou vaai i le matagofie o le Palemene o Samoa. O ai na itea lenei faaaloalo mo au, a o ai foi na matematea e te faatietie lou faatauvaa i le tumutumu o upufai o lo ta Malo? Se ua e fai ua mafai, ua e teu ua mateu. Le Atua e faafetai. Le Atua e, ia e faamanuia mai lou nuu.

E le faagaloina foi lou loto faafetai i si ou nuu o Lealatele i Savaii, Samalaeulu, Mauga ma Patamea. O la tatou mafutaga i tausaga e tele ua tuanai ma la outou lagolago na tuuina mai mo au, ou te faafetai ai. E ui ina o le a tatou valavala ona o tofiga ma vaevaega faale-itumalo faapalota, ae le mafai, le mafai ona aveesea lo ta soototo, lo ta sootino, aua e tasi lo ta aluga, tasi lo ta ieafu. Ou te faamalulu atu pe afai sa le i lava lau tautua mo outou, o lo o soifua le Atua na te silafia mea uma lava. E le faaititia lou loto faafetai i le afua mai mauga i tina ma tama matutua o si ou nuu na outou asa le gasu o le tuanai, o lenei ua manuia ai le aso. Faafetai le tapuai, mafatia tatalo i o outou tofaga. I a outou Afioga i Ositaulaga, Afioga i Tiakono, Susuga i Faafeagaiga ma outou Faletua o lo o faafalelemalu i le

afioaga o Tama Suafa ma le alaafaga o lo la Toalua, faafetai, faafetai tele le tatalo, faafetai le tapuai.

Afioga i Tamaitai Sa, o Aunafaapae o le Talalelei, faafetai mo la outou tatalo. Faletua ma Tausi ma Saotamaitai, faafetai i le agafesootai i galuega lelei, ua sisila lava le Atua i la outou faitaulaga. Faafetai le tapuai tatalo. Le tupulaga talavou, ou te faafetai ai i la outou galuega faatino. Aua ne i galo ia te outou, o mea lelei tou te faia nei, e talanoa ai taeao. Faafetai le talavou tautua.

E le faagaloina i lou fatu ma le agaga lupe faalele a si ou nuu, i latou ua tuua aiga ae o atu e talai le Malo o le Atua i Samoa nei faapea so o se atunuu o le lalolagi. O la le Tusi “amuia vae o i latou e aveina le Talalelei. O outou tulaga aao i nuu ese, o manuia mo Samoa, ma lo ta nuu”. Faafetai faafetai tele lava, le manatua o la outou auauna i la outou tatalo. Liliu le vai o Sina, ou te fia momoli le agaga faafetai i tupu ma tamalii, faletua ma tausii, tupulaga ma le malosii o le nuu o le Atua, i Aleisa i Sasae ma Aleisa i Sisifo. I susuga i faafeagaiga o lo o afifio ma papaaao i Aleisa. I lo outou augofie ma le loto lelei, ua faaalua i la outou lagolago i fuafuaga faataotooto a le Malo. Ia alo maia, o le taimi muamua leni, ua tuufaatasia ai outou ma Leauvaa. Ma ou te manatu o se ala faafaigofie foi lea e lelei mo fuafuaga alualu mamao mo lo tatou nuu i Aleisa. Aumai lo outou faatuatuaga, e tupu mea lelei i lo tatou galulue soosoo tauau, aua se lumanai o si o tatou nuu. E ui ina le i tini lau o le faamoemoe mo le mautinoa o le a tatou sui tauva, ua outou silafia lelei, le tou te tusi aao i ai mo le tofi o le itumalo i lea Paeaiga o loma nei.

E le faagaloina le loto faafetai i le paia o le Faalagilagi, Tuala ma Sala, mamalu o le la toalua Tevaga ma Vaifale, aemaise alo ma tama fanau a Leauvaa, o lo o afifio ma papaaao i itu e fia o Niu Sila, Ausetalia, Amerika, Tutuila ma so o se atunuu o le lalolagi. Se faafetai mo le tapuaiga, faafetai le lagolago, faafetai lo outou alolofa mai. I o’u sui tauva o lo o matou tausinio mo le isi Paeaiga, lau Afioga Sala Vaimili II, lau Afioga Tuala Oli. Ia aua ne i o tatou fefulituaai. O ai lava o le a filifilia, ia tatou loto tetele. O le ala i le pule o le tautua. E le o upu, a o ta galuega.

E momoli lau faafetai tele i si ou tina, o le igoa o lou tina o Tile. O le tupuaga o si ou tina, o le Krause. Nofo i lou tama o le... o Pinati, o le afa Saina. Na fanau mai ai le tagata lea e tu atu. E le aoga foi leni tagata aua e leaga. Ta fia tagi e ma o ta faapea atu, le Alii e, to maia ni manuia, aua taeao ma le lumanai o si o tatou nuu. Talofa, ia o tatou loto tetele. Si ou tuafafine pele o lo o faamuli mai i Uea, e monike le tamaitai lea. Ou te iloa lava e fautua mai ia te au, e faapea ana upu, “ia aveia oe ma Tama o tagata e sue galuega ia te oe.” Saunoa le Afioga i le Palemia, e fai se tusi e faaleo ai nisi faafetai. Lau Afioga i le Palemia, se pau lea o le mea o le a ou le usitaia ai lau Afioga, faamolemole faamagalo au. Ona e tatau ona ou faapea atu, e faaleo le leo lea. Ah! Tina, talofa e ia oe tina, mama my sweet

heart, o oe o le fetu, ou te moe i po uma, ma ou faapea ifo. Le Alii e, ia aua ne i e tuulafoai ia. Ae ia e faapea ifo, le Alii ia ma e faalatalata mai lou agalelei, ina ia aua ne i e toe se ese. Ou te le toe faia, o aso na o le valea, se o aso o le malosi. A e tamoe atu i inei e te oo i le malaevaalele, e te le sela, ae a aso nei? Ua oo lava i le tu, ua laki o le tu o le Palemia, ae semeamanu ou te matapogia i i.

Lau Afioga i le Fofoga Fetalai, e faauma atu ai se faamatalaga, ia faamanuia mai le Atua Silisiliese i le usugafono a lau Palemene. Soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le saunoaga a le Minisita mo Faalapotopotoga o Tagata Tafafao Maimoa Mai Fafu.*

**SUI FOFOGA FETALAI:** Ua faamalo saunoa i lau Afioga i le Minisita. O lea foi ua e tapa tulia i le tata. Ua faafofoga le Maota faapea le tapuaiga mamalu a Samoa, i le saunoaga faatoeaina o le Maota. Ona ou manatua ai lea o upu o le Afioga Paia a le Atua. Amuia e faatalitali i le Atua, amuia e faalagolago ma faamoemoe i le Atua i mea e manao ai. A lea ua e saunoa i lenei afiafi, o lea ua tau lava i le papa, le papa iila le saunoaga. E leai se vaipanoa e le i oo i ai le saunoaga. O le mea lea e momoli ai le faamalo ma le faafetai. E le uma le fia faalogologo a le Maota. O lea foi ua oo lava i le itumalo, e le gata i Malaeola ma Gafoga, a o lea lava ua e oo i lou itumalo fou. E momoli ai le faamalo ma le faafetai. Malo le manatu ane, malo le silasila i lau Afioga, malo galue. O lea foi ua momoli lau faafetai aua Ofisa Sili o Pulega o Matagaluega o lo o i lalo o lau vaavaaiga.

Lau Afioga i le Minisita, e le galo oe i le Nofoa, a o ta galulue ai i le Matagaluega o Leoleo ma Falepuipui, o ou uiga lava ia, o ou uiga lava ia. Fai mai le lauga faaamua a Iesu i le mauga. Amuia e agamalu aua e fai mo latou tofi o le nuu. Amuia e alolofa atu, aua e alofaina mai i latou. Amuia e loto mama, aua latou te iloa atu le Atua. Tulou lau Afioga, o uiga ia sa molimauina i na aso, o lea e oo mai lava i le aso. O la matou molimau, o lea foi ua ta feiloai i totonu o le Maota o le Palemene, e molimau mea uma. O le mea lea ou te tau le selu atu, o e uma lava e faamoemoe ma faalagolago i le Atua, e le vale sona tau. Ioe, ia alofagia e le Atua le faamoemoe o lau Afioga, aua le faiga filifiliga a le atunuu. O lea ua faafofoga mai lou itumalo, amuia lea itumalo, amuia. E te tali lava i le alofa mea uma, faamanuia le Atua i lau Afioga.

E talu ai o lea ua tatou taunuu mai i le taimi malolo masani o Fonotaga a lo tatou Palemene. O lea ou te faasilasila atu ai, o le a faataaiaese Taualumaga o le Fono Aoao Faitulafono mo lana malologa masani e 15 minute.

*Na faataatiaese Taulumaga a le Fono aoao Faitulafono mo lana malologa masani i le itula e 7:55 i le po ma toe faaauau i le itula e 8:40 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.*

**SUI FOFOGA FETALAI:** Ou te faasilasila atu ua toe amatalia nei Taulumaga o le Fono Aoao Faitulafono. E i ai lou talitonuga o lea ua maua se faasiligamalosi i le paia o le Palemene e faaauau ai outou faiva i lenei afiafi. Ua maea le tautega ma le taligasua sa alo i ai. E momoli ai le faamalo ma le faafetai i le Afioga i le Failautusi o le Fono mo tapenaga o lenei afiafi. Malo faafetai.

E faataatiaese Galuega a le Fono Aoao i le malologa, ua maea ona saunoa le Afioga i le Minisita o Tagata Tafafao mai Fafo. Ua oo atu le faasologa i le Minisita o Galuega ma Atinae tetele a le Malo. O le mea lea ou te tapa ai ma le faaaloalo lau Afioga i le Minisita, tulai maia mo lau saunoaga.

**Susuga Hon PAPALIITELE NIKO LEE HANG:** Ia faafetai atu i lau Afioga i le Fofoga Fetalai mo le avanoa. Ae le i amataina le lauga, e i ai le tala lea e fia fai atu lau Afioga. E i ai le talaave o si o matou nuu lea o Falefa, o lea ou te matai ai foi i lou Tepafoai. A lauga le tofa i le matua le Iuli, e 2 po 2 ao o lauga. Na talanoa mai nei lava Lufilufi ia te au, e manatua e 2 po, 2 ao o lau lauga. Ae le afaina lea, leaga e manatu alofa atu foi ua leva ona tatou gasea ma faaaaogagase i le tatou Fono. Atonu, ua lava le po lenei ma se ao e tasi taeao, ua lava ai foi lea. Ae faafetai i lau Afioga mo le avanoa.

Ia mua o, mua o, mua o, ou te muai faatalofa atu ma ou faatulou atu i le paia ua sasao nei. Afio lau Afioga i le Fofoga Fetalai, afio lau Afioga i le Palemia, afifio Minisita o le Kapeneta, faapea Afioga i Minisita Lagolago, afifio a outou Afioga i Taitaifono ma le mamalu o sui uma o Komiti faa-Palemene o le Maota, faapea sui mamalu uma o le Palemene o Samoa. Ou te fia faatalofa atu foi ma ou faatulou atu i lau susuga i Le Ao mamalu o le Malo, lau Afioga i le Tuiaana ma lau masiofo. Lau susuga i le sui o le Fono o Sui Tofia ma lau Masiofo. E fia faatalofa atu foi ma faatalofa atu foi i lau Afioga i le Faamasino sili, lau Afioga i le Peresetene o Fanua ma Suafa, alii ma tamaitai faamasino ma le Ofisa o Faamasinoga.

Ou te fia faatalofa ma faatulou atu foi i le paia o Samoa o lo o faafogafoga tapuai mai i maota ma laoa i le Fonousu a Samoa. E mai lava i mauga tetele seia paia mauga iti. Ae a le paia o le afaigaluega tofofi o le Talalelei i so o se Fatafaitaulaga i so o se tafa o Samoa, o lo o

faanonomanu aua se manuia o Samoa ma ona tagata. E faafetai tele atu mo lau tapuaiga mau. E faatalofa atu foi i le loaloa o Ofisa Sili o Pulega o Matagaluega ma Faalapotopotoga Tumaoti a le Malo. Lau Afioga i le Failautusi o le Fono faapea le loaloa o le aufaigaluega galulue a le Malo, faamalo le onosai, faamalo le tauatai. O outou paia faale-ekalesia, o paia faale-atunuu, o paia faale-Malo, i ona tulaga faalupelupeina, o le a nuunuu atu ia faatini o tausala. E le tau autalaina i se faamatalaga aua o Samoa o se ia e iviiviva, ua taoto aeo se alaoo. Lau Afioga i le Fofoga Fetalai, ou te fia faaaogaina foi lenei avanoa, e momoli atu ai alofaaga ma se faamaisega i le tina loto nutimomoia, le afioga ia Vaelaa ma si ona alo, faapea aiga na lua loto faavauvau. Ona o le valaau paia a le Atua i le alii faipule, o se uso foi ia te au, lou nei tagata, le Afioga ia Vaafusuaga Toleafoa Ken Poutoa. Ia outou maua pea le mafanafana ma le filemu o le Alii ao ufitia ai i le ao pogisa, ona o le malaga e le toe foi mai, o le tama o le aiga faapea le itumalo. Ou te fia faamaisa atu foi i le Afioga ia Lealailepule, o lou uso ia Keriso faapea le tama o le aiga aemaise uso ma tuafafine o tagi mai ala ona e le mafai ona faatasi mai, i toe sauniga o le tina o le aiga, ona o le Koviti-19. Tainane le paia i aiga na lua, ona o le valaau paia a le Atua i le tina o le aiga faavauvau.

Lau Afioga i le Fofoga Fetalai, ou te manatu o fesili uma mai sui mamalu sa afea Matagaluega ma Faalapotopotoga o lo o i lalo o lau vaavaaiga. Ua maea ona ou tali atu i ai, ma ua faamauina foi ia fautuaga, aemaise foi o talosaga fou faaopoopo, aua lava le tali atu i outou manaoga.

Lau Afioga i le Fofoga Fetalai, e 10 le aofai o Pulega ma Matagaluega o lo o i lalo o le vaaiga a le Minisita o Galuega. E aofia ai le MWTI, EPC, o le SWA, LTA, SPA, o le Pulega o Malaevaalele, SSC, SSS, le PUMA ma le PFL. Ae muamua lava ona ou fia faailoa atu galuega tetele, a lo tatou Malo sa faatino ma ua maea i lenei 5 tausaga o le tatou Nofoaiga m ai le tausaga 2016 i le 2021. E faapea foi isi galuega tetele o lo o faaauauina pea i le taimi nei. Ua maea foi ona fuafuaina ma faataatitia nisi foi galuega tetele a lo tatou Malo, mo le tausaga 2021 – 2026. O galuega tetele uma sa faatino i le 5 tausaga o lenei Nofoaiga, e aofia ai galuega o lo o faatino i lalo o le Matagaluega o Galuega. Ua maea ona faatino le iloiloaina, ma le lauliliuina o le taiala mo le saogalemu i luga o alatetele i Samoa, Samoa National Action Plan for Road Safety. Ua maea foi ona faatino le iloiloaina o le saogalemu i luga o alatetele ma fautuaga e mulimulitaia ai faatinoga, Samoa Road Safety Pathway Assesment 2016.

Ua maea foi faatino le iloiloaina o alafua ma taiala mo le fausia o auala o Samoa, Review of National Road Stanadards in Samoa 2016. Ua maea foi ona tuufaatasia le taiala mo le mataituina ma le pulea lelei o aseta tetele uma a le Malo, Samoa Infrastructure Asset Management Strategy 2018. Ua maea foi le vaega muamua mo le fausiaina o le talivai, river wall i le va o le auala sima o le Vaisigano ma Leone. Ma o lo o faaauau pea lenei atinae

e tau i le 2023. Aua le saogalemu ma le faaititia o aafiaga o le atunuu o lo o alala i lea nofoaga apovai mai lologa, o le Vaisigano Catchment Project. Ua maea foi ona faatino se tasi o fuafuaga, faataatia a le Malo mo le faamatagofieina o talafatai ma le taulaga i Apia. I le maea ai ona fausiaina o le Apia Waterfront Events Space, ma le Clock tower i le 2019.

Ua maea ona fausia le Tulafono Faatonutonu, mo le fausaga o fale, National Building Code 2017. Ua maea fausia le taiala mo le faaaogaina o le Tulafono Faatonutonu i fausaga o falenofo fogafale tasi, Guidelines for the Application of the National Building Code, to Single Story Residential Housing 2018.

Ua fausiaina le faiga faavae mo le laiseneina ma le resitalaina o kamuta ma konekarate faufale, Aperila 2020. O le poloketi mo le atinaeina o le gataifale o Apia, Apia Waterfront Development Plan Project 2015-2021. Ua maea tapena le fuafuaga mo le atinaeina o le gataifale o Apia, Apia Waterfront Development Plan 2015-2026. Ua maea le tusiaina o le taiala mo le fuafuaga o galuega o nofoaga o le taulaga, Urban Designs Standard 2018. O le fausiaina o le malae taalo mo tamaiti i Sogi, faatupe e le Malo o Niu Sila. Fausiaina o nofoaga malolo i Matagalalua ma lumafale o le Maota FMFM II, o le Clocktower plan ma le Event space. E faatinoina tai masina suesuega a le Suavai mai Vaiala i tau i Mulinuu, monthly water quality tests. E faatino galuega mo le fausiaina o le malae malolo, friendship park ua fuafuaina e maea i le 2021. O galuega o lo o fuafua mo le tausaga 2021-2026, e faaauau galuega vaega 2, 3 ma le 4, mo le poloketi mo le siitia o le malupuipua o Vaisigano mai aafiaga o lologa, Vaisigano Catchment Project Green Climate Fund o lo o fuafua e maea i le 2026. E faatino le suesuega talafeagai o se laina tuufaatasi, mo le suavai lafoai o le taulaga o Apia. O lo o totogi i lalo o le poloketi o le GCF, Green Climate Fund, o le feasibility study for integrated several season in Apia. Faauma galuega mo le fausiaina o le friendship park o lo o faatupeina e le Malo o Saina, aua le faaopopo atu i le poloketi o le Apia Waterfront.

O galuega fou tulituli mo le lumanai. E toe iloilo fuafuaga mo Vaitele o lo o avea ai ma nofoaga mo pisinisi talafeagai, industrial zone. Ma toe iloilo ma saili se nofoaga talafeagai mo pisinisi e le o maua ai se saogalemu ona o le pefu ma le pao e pei o vilimaa.

O le Matagaluega o le EPC, Pulega ma le Malosiaga faaeletise. O poloketi nei sa faatino i le 2016-2021. Ua maea le afi vai hydropower i Tafitoala, Fausaga, Vailoa i Savaii, ma Fuluasou lea e faapea e faauma nei i se taimi o le tausaga nei. Toe faaleleia le afi vai i Alaoa, fale o le fee, Loto o Samasoni, o Taelefaga ma le Generator faaopopo mo Taelefaga. Maa, batteries mo le teuina o le eletise i Fiaga ma Faleolo. E 750 kilowatt biomass classification plant, ua uma ona faatulaga i Mulifanua i le fanua o le STEC. Faaleleia le afi vai i Lalomauga, e 3.75 megawatts. O poloketi o lo o faagasolo i le taimi nei a le EPC o la e faagasolo le Smart Metering

Program e 30,000 le aofai o mita e tatau ona faapipii i maota ma laoa. O le taimi nei ua uma ona faapipii le 3,000 mita. O le Vaipu Pumping Scheme, o le vai lea e toe fia pamu agai i Afulilo. Season Protection Study, e faafoia ai black outs ona o ni faalavelave faafuasei, accident, e aafia ai pou eletise. Fiaga Power Station Lightning Protection System, e taofi ai black outs ia e mafua mai i uila emo. E tau pei o le faaletonu lea na tulai mai ia Fepuari i le tausaga ua tea. O le poloketi o lo o fuafua mo le lumanai. O le Alaoa Multipurpose Dam, o le tau e US\$98 i le \$100 miliona, o lo o faatupe e le ADB, ia faapea ma isi tatou Development partners, aemaise o le tatou Malo. Mount Lepue, 20 megawatts wind farm at Lepiu. O generators faaopoopo mo Tanugamanono, for upgrade and stand by. Diesel power station faaopoopo mo Savaii. Lalomauga hydro plant 2.5 MPa transformer. Smart Distribution Grid Remote Control. Gross island powerlines mai Tanugamanono i Siumu. Taipapata new hydro station, o lea ua faataufo nei le galuega lea.

Distribution expansion network community services application, o fesoasoani ia e auala atu i le tatou CSO. Solar palm mo Savaii, renewable enegy green market o lo o faatalanoa nei le PPA mo lea faamoemoe. O lea foi e faamoemoe o le a oka mai e le EPC ni taavale e alu i le eletise. O lea la ua faatautui ni taavale e 5 mo vans, ma le 5 Estuaries se i amata ai foi lea poloketi.

O le Pulega a le Suavai. O galuega faatino 2016-2021, o vai na vili i Gataivai, Sataua, Saleaamua, Satapuala ma Nofolii. O tanevai fou sa fausia, o Gataivai, Sataua, Saleaamua, Satapuala, Nofolii, Faleasiu-uta, Tanumalala e lua, Lepale, Afiamalu, Malololelei, Matavai, Magiagi, Samata, Saleaula, Seese e 2 ma Aleisa Sasae. O galuega fuafua mo le 2021-2026 i le Pulega o le Suavai. O galuega faalelei mo Vavau, Lotofaga, e aofia ai ma Salani i le pito i luga. O galuega faalelei mo Aleisa Sisifo, galuega faaauau mo Malololelei ma Afiamalu. O galuega faaauau mo le Ofisa autu i Vaitele, suia le paipa i le alititai mo le suavai i Manono-tai. Ia fai ni faataitaiga mo le faaaogaina o le malosi o le la e faaeletise ai vai vili ma vai mai le manava o le elele. Ia faatino ni vai vili mai le manava o le elele i Vailele ma Moamoa-fou. Ia faasopolia le auaunaga mo le suavai mama mo le mamalu o le atunuu, ina ia 100% le faasopolia. I le taimi nei, ua 99% le coverage i le taimi nei. A o le 11% o le auaunaga, o lo o faaaogaina nei le vai tumaoti. Ia faaleleia laina paipa mo le suavai i le taulaga o Apia. A outou tagai i ai, i le galuega tele lea e fai, i alavai ia e fai ma poloka i le taulaga o Apia lea e faatino nei lea galuega. Ia faalautele le faataatiaina o laina paipa mo otaota lafoai o faleletaua, ma le faaopoopoina o ni nofoaga mo nisi auaunaga faapenei. Ia faalautele le polokalame mo le SCADA supervisory control and data acquisition, e faapea ma le faataatiaga mo le polokalame fou o smart meters.

E i ai le galuega lea e fai nei i Samusu i le suavai. O lea ua faatino e le Pulega o le Suavai. E i ai le tala lea ou te faalogo i ai, e faapea o la ua faaaoga foi e isi tagata e campaign e faapea o latou la e faia. O galuega uma lava tau suavai e faia uma lava e le Malo, ae auala atu i le Pulega o le Suavai, mo le silafia foi e lea afioaga.

O le Pulega o Felauaiga i le Laueleele, LTA. O galuega tetele tau auala na faatino i lenei 5 tausaga. O le auala sima kolosi i Leone, auala sima kolosi fou i Vaisigano, sa faatupe e Iapani, e \$44 miliona. O le auala sima kolosi fou i Samalaeulu na faatupe e le World Bank ma le Malo o Ausetalia e \$12 miliona. O le auala sima kolosi i Moamoa, Niusuatia ma Aia i Sopoaga, faatupe e le World Bank ma Ausetalia. Auala uamea kolosi fou i le Loto i Samasoni, joined funded e Ausetalia ma le tatou Malo. Faalautele ma faaloloto alavai i totonu o le taulaga, o le Green Climate Fund, maea le toe faaleleia o le West coast road mai Saina i Malua, o le fesoasoani lea mai le World Bank ma le tatou Malo. Faaauau galuega mo le fausiaina o le auala mai Fusi Safotulafai seia paia Patamea.

Lau Afioga i le Fofoga Fetalai, o le aofaiga o seleni sa faaaluina i galuega tetele o Capital Works mo le fausiaina o auala galue, auala sima kolosi, taligalu lata ane i auala faapea galuega faifaipea, routine maintenance i Upolu ma Salafai i le 5 tausaga o le tatou Nofoaiga, 2016 - \$29,568,343. 2017- \$27,923,182, 2018 - \$28,535,677, 2019 - \$28,277,273. 2020, ia ua \$41,575,152. A tagai ia outou afioga i le aofaiga, ua ova ma le piliona tala tupe ua faaalu e le Malo ia auala ia e faatino ai ia tatou galuega i le 5 tausaga o le tatou Nofoaiga.

Ia e le o aofia la i nei tupe faaalu ia seleni faameaalofa mai i foai, mai grants mai i tatou paaga atinae Development Partners. O galuega tetele fuafuaina mo le 2021 i le 2026, faaleleia le auala sima kolosi i Lelata, o le Green Climate Fund. Faaleleia ia auala kolosi i Lano ma Sapapalii o le fesoasoani a le World Bank. Faaleleia le auala sima kolosi i Afega, fesoasoani a le World Bank. Faaleleia le Cross Island Road i Tanugamanono i Siumu, o le ADB. Faaauau le faaleleia o le West Coast Road mai i Malua i Faleolo, o le World Bank Grant. Faatino le suesuega mo galuega e taofia ai le solo o palapala ma mauga i le East Coast i le itu Sasae i Upolu, faapea ma Safotu ma Manase i Savaii. Faaleleia alafaalava mai i Aleisa i Tanumalala.

Lau Afioga i le Fofoga Fetalai, o auala galue, o galuega tau auala galue o lo o fuafuaina mo Upolu ma Savaii, ae e le i maea le Tala Faatatau o le Tupe ia Iuni 2021. O Upolu o le auala lea Samalaga i Alafua, o le auala lea i le vilimaa. O le Tufulele Road, Launiu Road, Pati Road, Solosolo uta Road, Falelauniu Road, Aleisa Sasae, Fusi Safata, Tuvao, Sainamau Road, Manunu Road, Vini Road, Apaula Street, Salesatele Road, Vaovai ma Matautu Road, Utulaelae Falealili, Lotopue ma Utufaalalafa, Saleaamua ma Satitua, auala i faleaoga Tulagalua i Leauvaa ma Satuimalufilufi.



O galuega ia e faamoemoe mo Savaii, Malae Road, Tapueleele Road, Lalomalava, Utuloa i Asau, Satupaitea Road, Nuualofa Falelima Road, Sagone le auala i le aoga i Sagone.

Ia lau Afioga i le Fofoga Fetalai, e le o po lava malae i suiga o le tau i le aafiaga o auala i lenei vaitau. Ae o lo o galulue pea le Pulega o le LTA i le tulaga vave e mafai ona faafoi ai ia tatou auala o lo o aafia i mea ia o lologa, aemaise foi o timuga. E fai lava si tele o le galuega leaga o lo o aafia uma le tele o tatou auala, ae o lea e taumafai lava le Pulega e fai se tulaga e faalelei ai ia o tatou auala i se taimi vave.

Ia ona ou oo mai lea i le Pulega o le Uafu, Samoa Port Authority. Atinae sa faatino mai i le 2016-2020 ma atinae faaauau. Faalauteleina o le uafu i Matautu, enhancement of safety of the Apia Port faatupeina e le JICA. Faaleleiina o vaa toso vaa e tug boats. Faafou le moli o le ava i Mt Vaea, ma moli faailo i le ava i Apia. Faalelei o le uafu i Matautu e aofia ai ma le taligalu break waters, faatupe e le ADB i lona tau e \$75,000,000 Amerika. Uafu mo Manono Uta faatupe e le JICA le fale faatali pasese, ae faatupe e le SPA le uafu.

Moli o le ava Way of the Cross i Mt Vaea, vaa mo pailate pilot boats, suesuega mo le uafu i Satitua Aleipata, suesuega mo se nofoaga mo se toso vaa e aofia ai se floating facility.

O le uafu i Vaiusu 2021-2026, lau Afioga i le Fofoga Fetalai, e tasi lenei o atinae taua a le Malo, ua fuafuaina aua se manuia o Samoa ma ona tagata, mo a taeao ma e lua. O lenei foi atinae o le a manuia ai le itumalo o Faleata Nu.2, aemaise ai le afioaga o Vaiusu ma nuu tuaoi e tai pei o Vailoa ma Vaigaga. E faanoanoa lava se taofi ona e taulamua lava i le sui usufono lea e le o alaala mai i i ia ma le latou vaega ia Faumui Wayne le tetee mai pea, ma taufaaleaga mai i lenei atinae taua o Samoa. Ua pei lava o se fagogo tagiao i le sui usufono, le tetee pea i lenei atinae taua mo Samoa ma ona tagata.

Lau Afioga i le Fofoga Fetalai, ua toatele nisi o le itumalo o Faleata Nu.2 aemaise Alii ma Faipule, ua talanoa mai ia te au ma faamalo mai ma faafetai mai i le Malo, mo lenei atinae e manuia ai Samoa, aemaise ai lo latou itumalo o Faleata Nu.2. Ae peitai, e le finagalo ai le sui usufono le tama o le itumalo.

Lau Afioga i le Fofoga Fetalai, sa auai le Afioga ia Fiamē ia ma Laauli lea e le o alaala mai ia la nofoa, i le taimi sa faatalanoa ai e le Kapeneta lenei atinae. Ma sa laua taliaina foi ona o se atinae e manuia ai Samoa. O lau tuualalo atu i a oulua afioga, masalo o la e te lua faalogologo mai, o oulua o Taitai o le tou aiga Faatuatua i le Atua, se talanoa ma fautua atu i lo outou sui laitiiti lea, e leai ni ana ai faaopoopo mo le palota, na o ai toese e na te maua, ma i lona taumafai mai pea e tetee ma taufaaleaga mai i lenei atinae taua mo Samoa mo a taeao ma e lua.

Lau Afioga i le Fofoga Fetalai...

**Tofa Lealailepule Rimoni Aiafi (Faleata Sisifo):** Lau Afioga i le Fofoga o le Fono... faamalulu atu lava e vave lava leaga o lea e faamaumau tatou... lau Afioga i le Minisita.

**SUI FOFOGA FETALAI:** Malie le sui usufono mai i Faleata pe i ai se mea o...

**Tofa Lealailepule Rimoni Aiafi:** Ioe, e le te i te i tu le sui usufono o Faleata lau Afioga. E na o sina mea e faasao.

**SUI FOFOGA FETALAI:** E fia faasao, ia saunoa.

**Tofa Lealailepule Rimoni Aiafi:** Ioe, leai o lea na saunoa le Afioga i le Minisita, e tetee i ai le tama o le itumalo. E le o se tama lea o le itumalo. O au le tama o le itumalo i le taimi nei, ma e le i oo i le taimi ma e le oo lava i ai. Ae afai o lau fautuaga lau Afi oga o lea ou te tilotilo i le layout ina o le uafu, e tele atu i Vaitele. Afai e musu ai le vaega lea, faaigoa loa o le Vaitele Wharf, ona le toe i ai lea o se vevesi, aua e pei e tele i Vaitele le uafu lau Fetalaiga Faleafa.

Ae o le mea lea mo faamaumauga, e le o tetee le tama o le itumalo i le uafu, o lea e taulamua i le faiga o lenei atinae taua mo Samoa atoa. A o le sui usufono lea e saunoa i ai le Afioga i le Minisita, e le o se tama, e le o se tina, e le o se matai foi o le matou afioaga, faafetai lava.

**SUI FOFOGA FETALAI:** Faafetai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalaia...

**SUI FOFOGA FETALAI:** Ia se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E fia faamalamalama atili ia e pe e fia faasao foi, e le limataitaiina le Malo i ni upu o se pola e motu i tua. Ma e ao lava ina faataoto ia le... se atinae e lautele le vaai a le Malo. Ma e leai lava ma se feau a le sui usufono lea i le sami lea e fai ai le faamoemoe.

Masalo o le faalavelave lea mo mea o sui usufono, e talanoa i mataupu ae le muamua tilotilo i le Faavae o le Malo o Samoa. Faavae o le Malo o Samoa, e pule le Malo i so o se ogasami. E oo lava i le mea e oo i ai i le sua tutui oooo o le tai. O le ala foi lena o so o se matafaga lava, po o fea lava e i ai, po o tua i Lepa po o se isi lava mea, e le mafai ona aveesea se

oneone seiloga e avatu se pemitā, e ui lava e i ai lava isi e o ane ave i le po oneone. Ae a maua e le Malo e faasala.

Lau Afioga i le Fofoga Fetalai, o le tulaga lena ne i faapopoleina ai ia le afioaga. E vaai le Malo i le aoga lautele o le atinae mo tupulaga fai mai o i i nuu ia e tai pei o Vaitele, o Vaigaga o Vaiusu, faasolosolo mai i Lepea, ia ma Vailoa, ia o nuu ia e faapea e tu tonu lava i i i le mea e i ai le uafu. A o le tulaga lea e aumai i le sui usufono, e leai se mea e popole ai fua ia o le tagata e maua mea. Ae moomia e fanau a le itumalo ni galuega a latou fanau. O le ala foi lena e le popole ai, ma e leai lava ma se taua o ana faasilasilaga ia e fai. E matua leai lava ma se taua lau Afioga, o le mea la lea mo i latou o faafogafoga mai, e aua le amanaia le pola e motu i tua.

**SUI FOFOGA FETALAI:** Ia, e le toe oo foi i ai se tala a le Nofoa lau Afioga i le Minisita o Galuega Tetele a le Malo, manatu o le moni lea ma le faamaoni o mea uma. O lo o lagona lava le loto faafetai i le atinae o lo o taumafai i lo matou itumalo. O le mea lea, alo i ou faiva, aua le amanaia le pola lea ua motu i tua.

Ia se i tuu atu le avanoa e faaauau lau saunoaga.

**Susuga Hon PAPALIITELE NIKO LEE HANG:** Ia faafetai foi i lou uso ia Keriso e tusa ai ma le faauilavea. O le mea sili lea ua ou manino, o lona uiga e le o se tama o le itumalo, ae o le sui o le itumalo. Faafetai o lea la ua malamalama, ae o lea e faaleaga mai atinae, faapea ta ita o le tama, ia e leai la o le sui o le itumalo. Ae o lea la e saunoa mai le Taitai o le itumalo, le Afioga ia Lealailepule.

Faafetai foi i lau Afioga i le Palemia, toe faamanatu mai le tulaga lea. O lea la ua toe matau atu foi i i, e le malamalama nei tagata, e oo i tamai sui usufono laiti ia, leaga e fou mai e le i taitai. O lea la e le o saofafai mai i i, ae na ou mana'o ou te talanoa atu i ai ma autilo mai. Ia a o le faalavelave o la e autilo mai i le TV. Ia omai taeao e fai se tatou tala. Tou tafafao, tafafao, tafafao ae e le omai i a tatou Fono lea e fai.

Ia lau Afioga i le Fofoga Fetalai, ua lailoa le Faigamalo vaega a le HRPP e tausaili mai ia fesoasoani mai i tatou Development Partners, e faatupe ai tatou atinae tetele. Ae peitai, o saunoaga ia taufaaleaga, taufaasese, masalosalo lea ua tau aafia ai ia le tatou vafealoaloi ma le Malo o Saina. Leaga ua oo mai se faasea a le Amepasa Saina ia te au, talu ai ia latou tusitusiga i le Observer i le Aso 2 o Fepuari, lea e saunoa ai le sui usufono latiiti lea, ma fai mai o le militeli a Saina lea o le a fai i le uafu lea. Vaai i le le mafaufau, e le taitai lava oo se manatu o Saina i nei mea.

O la e malupuipua tatou i Pulega a Alii ma Faipule, e le taitai oo tatou i se tulaga faapea. A o tuuaiga ua fai si matuia, ua faanoanoa ai la le Amepasa. Ia ou te leiloa po o ai nei tagata e fia taitai ae se i vaai i saunoaga... o lea o le a lailoa ia le Vaega a le HRPP i le Malo e tausaili mai

fesoasoani e atinae ai ia lo tatou atunuu, ae solomua i ai latou le faaleaga. Ia na ona faapena atu i le sui usufono lea o le itumalo. O lea la na toe tali mai ia le Ofisa o le Amepasa, e le faavaea ia tuuaiga. Ma e o le upu faapapalagi lea na tau mai i le faamatalaga, e groundless. O lona uiga e leai se faavae e moni ma e masalosalo foi, ia e pei o le tulaga lena lau Afioga i le Fofoga Fetalai, e toe faapupula atu ai le tulaga lea leaga e tatau pea ona faasao e le o se uafu faamiliteli a Saina lea e tau aumai e ...

Ia lau Afioga i le Fofoga Fetalai, ua lata nei i le 50 tausaga le mafutaga valalata ma le mafanafana o le tatou Malo ma le Malo o Saina. Ma ua tele ma lasi foi fesoasoani ua o tatou maua mai i le Malo o Saina i a tatou atinae e pei ona tatou molimauiina.

Lau Afioga i le Fofoga Fetalai, sa faamagalo foi e Saina se tatou aitalafu e \$68 miliona tala i le 2006. O fesoasoani ia sa fausia ai le tatou FMFM Building, Tooa Salamasina Building, ia ma le Apia Park Gym. Ma ou te tautino atu i le mamalu o le Palemene, e leai, leai, leai lava se agaga intention o le Malo o Saina, e latou te fia aveina ai ni a tatou fanua, ona ua tele ni a tatou aitalafu. E pei lava o le fagogo lea ou te faalogo pea i ai, o le a uma le tele o aitalafu ae masalo o le fuafuaga a le Malo e ave nisi fanua ma Saina, ia ou te tautino atu, e leai ma se tulaga faapena.

O lea foi ua ma talanoa ma Saina ma ou talanoa lava i ai le mea lea, ae tautino mai lava le Amepasa Saina, e leai, leai ma se intention o le latou Malo o le fia fesoasoani mai ia tatou. O le mafutaga la i le taimi nei, matuai mafana lava. Ae o ituaiga saunoaga ia, ia e le taitai toe omai Saina e fesoasoani i ai. Ia na o lou alofa lava i ai aua e...

Ia ae se i fai atu se faamatalaga lau Afioga i le update o le tatou galuega lea i le uafu. O lea ua maea le feasibility study e aofia ai ma surveys na faatinoina i le faaiuga o le 2019 i le amataga o le 2020. O lo o faatali le taimi e tuuina mai ai le lipoti o le suesuega, ma mautinoa ai le taimi e amatalia ai lenei atinae tele, tele ma taua mo le atunuu, aemaise ai le itumalo o Faleata Nu.2.

Ua maea foi se suesuega na faatino i le 2019 e le Pulega a le SPA ma le Kamupani KVA. Na toe asiasia ai nisi suesuega na faia muamua i fuafuaga alualu mamao a le Pulega a le SPA mo le isi 20 tausaga o lumanai. Ma o nisi nei o vaega na maua ma faamaonia i lenei suesuega, o le realignment of SPA Strategic Direction including a business case to the Vaiusu Port.

Lau Afioga i le Fofoga Fetalai o mafuaaga ogaoga na maua mai i lenei suesuega, ua tatau ai ona fausia le uafu Faava-o-Malo i Vaiusu. Ua vaapiapi le uafu i Matautu mo nisi auunaga ma nisi atinae faaopoopo ma ua le lava nofoaga e pipii ai vaa, ma nofoaga e teu ai pusa oloa. E aafia gofie tele le uafu pe a oo i le vai tau e oso ai galuaau po o swells. Ma e tele ina taofi ai galuega o le vaa, ma e alofia ai foi e vaa ia le uafu i Matautu i le vai tau lea.

O le a relocate mai tane suauu ona e latalata Vaiusu i Sogi. Ma o le a aveesea foi le paipa suauu le fuel line pipe, o lo o faataoto mai i Matautu agai mai i totonu o le taulaga sau ai i Sogi i tane suauu.

Lau Afioga i le Fofoga Fetalai, e tele ma ogaoga se aafiaga o le taulaga pe a tulai mai se mu, e pei ona mu ai le isi tane suauu i Matautu i le 2016. O le i ai foi o le isi uafu Faava-o-Malo e tua i ai le atunuu pe afai e toe tulai mai se faalavelave e pei ona paulia ai le Forum Samoa i le ava i Matautu i le 2009, ona o le malolosi o galu swells galuaau, lea na poloka ai le toe faaofi mai o ni vaa mo le masina atoa. O le a faigofie foi ona maketi atu Samoa, o se taulaga e ogatotonu i ai felauaiga o pusa oloa i le Pasefika, transshipment harbor of the Pacific, pe afai o le a tele vaega e pipii ai vaa tetele, berthing spaces, ma lava nofoaga e teu ai pusa oloa containers storages. O le a avanoa foi, o le a avanoa loa le uafu i Matautu mo vaa tafafao cruiseships , vaa mo fesootaiga cable ship, aemaise o le a lava ai avanoa mo vaa mai Toelau, aemaise ai femalagaiga mo Amerika Samoa.

O le a mafai foi ona maketi atu le uafu i Vaiusu mo vaafaila tetele super yacht. O lea tele nisi auaunaga faaopoopo mo le Private Sector, e i ai container cleaning, stevedoring, container drug companies, ma nisi e tai pei o ni avanoa faigaluega mo le mamalu o le itumalo. E latalata i Vaitele le Industrial Zone, ma faasaoina mai ai le soli i taimi uma o le taulaga i Apia e loli mamafa, ma o le a faaitiitia ai le traffic i lea vaega o le taulaga. O le a mautinoa le mafai i aso uma o le tausaga 365 aso ona faapipii mai vaa, ona o le a le toe aafia galuega mo vaa i galuaau po o swells ona e malu lelei le nofoaga o Vaiusu Bay ua taua o se protected bay.

Lau Afioga i le Fofoga Fetalai o nisi nei o mafuaaga ua siitia ai ia le tatou uafu Faava-o-Malo mai i Matautu i Vaiusu. A o nisi nei o galuega lau Afioga i le Fofoga Fetalai ua fuafuaina e le Pulega o Uafu mo le isi 5 i le 10 tausaga i le lumanai aua lava se manuia o si o tatou atunuu vaivai ae sailimalo. Faaleleia o le ava i Asau 2021-2026. Toe fausiaina o uafu i Lelepa, Fagamalo 2023/2024, uafu Faava-o-Malo Salelologa 2022/2026, ma le faaleleia o le ava mo vaa asiiasi i Sinalei.

Pulega o Malae vaalele, galuega faatino i le 5 tausaga o le tatou Nofoaiga lenei, 2016/2021. Maea fausiaina fale fou faatali ma faaee pasese faatino i le fesoasoani o le Malo o Saina i le tau e \$53 miliona Amerika. Faamaea le poloketi a le World Bank mo Aviation Project, mo le faaleleia o aseta uma mo le saogalemu mo le malaevaalele i le tau e \$43 miliona Amerika. Faatu se pou e 45 mita le umi i le mauga o Fiamoe mo le faaleleia o fesootaiga ma vaalele. Fausia se fale fou mo le susunuina o taumafa totoe ma isi mai i le vaalele. Faapa le fanua sa nofoia e le mamalu o le afioaga o Satapuala, e faasauni ai mo le toe faalauteleina o le alasesee mo vaalele i le umi e faaopoopo i le 300 mita agai i le itu i Sasae. Faatau se masini mo le aoaoina o faatonutonu vaalele o simulator e na o Samoa le motu laitiiti o le Pasefika o i ai se masini faapea, ma o lo o faamoemoe e faaaogaina mo le

aotauina o ni sui mai isi atumotu o le Pasefika. Fausiaina ni faasinoala e faaoga ai satellite mo vaitaimi louloua o le tau i malaevaalele i Faleolo ma Maota e faatupe e le Malo o Niu Sila.

Maea le vaega muamua mo le fausiaina o le alasesee mo le malae vaalele i Tiavea. Faamaea le vaega 2 mo le fausiaina o le malae vaalele i Tiavea mo le fausiaina o le alasesee, pakaga o vaalele, fale faaee ma fale faatali pasese. O lo o tauofo nei le galuega lea mo le faataina o le alasesee o le run way.

Lau Afioga i le Fofoga Fetalai, o le tatou malae vaalele i Tiavea, o lo o fuafua mo le tatou vaa Twin Otter, faapea vaalele ATR-42 ma le ATR-72, e mafai ona malaga ai pasese e toa-40, i le 50. O lo o maua pea le faamatalaga mai i le aufaitio, o le malae vaalele e le mafai ona land ai se vaalele e tele. E leai se fuafuaga a le Malo e fai se malae vaalele mo le 737, e na o vaa lava ia o le Twin Otter. Ia ma lea la o le a faaopoopo le isi vaega o le run way, ia mafai ona land ai vaalele ia ATR e ofi ai pasese e 40-50. Ae e leai lava se tapenaga ma se faamoemoe, e fai se malae vaalele e land ai se 737.

O faamatalaga ia e faaseseina ai le mamalu o le atunuu, ma tuuai ai le malae vaalele i le fai o le la tamai malae vaalele, ae iloa e le ofi ai se 737. E le i faia se malae vaalele mo se 737 mo le silafia e le mamalu o le atunuu. O le fuafuaga mo le lumanai 2021/2026 o le malae vaalele i Faleolo...

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai..

**SUI FOFOGA FETALAI:** Malie le Afioga i le Minisita se i tuu atu lava le avanoa i le sui usufono o Palauli le Falefa.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, e faafetai i le Afioga i le Minisita mo le saunoaga matagofie, leaga o lea sa ou taua le vaega lea. O lau fautuaga na fai i ai, toe 500 lava mita, ona mafai lea ona land ia le 737. Na pau lava lena o lau tala ae ou te le i fai atu e land ai ni vaalele 737. E a foi lea o le 1,400 la e i ai i le taimi nei, o lea la e sao lelei lava ia le saunoaga a le Afioga i le Minisita, ao lau tuualalo, manaia pe a faaopoopo ina ia avea ai o se full international airport. E tu laueleele ai ia le 737, o le tuualalo ma lou faaaloalo lava.

**SUI FOFOGA FETALAI:** O lea ua manino auofala i le finagalo o le sui usufono mamalu, ia ae tulai mai lau Afioga i le Minisita e faaauau lau saunoaga.

**Susuga Hon PAPALIITELE NIKO LEE HANG:** Faafetai atu i le Afioga ia Faumuina, leai e le o faia sau faamatalaga i le Afioga Honorable Faumuina. O tala a tagata foi lea e faitio, ae e le o le saunoaga... o lea ou te talitonu na fai lana...ae lea e tau faamatala atu, na fai le malae vaalele lea, masalo mo se taimi i le lumanai, ae o le taimi nei, ia o le Twin Otter lava ma ATR lea ua tapena ai ia le tatou malae laitiiti la.

**SUI FOFOGA FETALAI:** Malie lau Afioga i le Minisita se i tuu atu lava le avanoa i le Afioga i le sui usufono mai i Aleipata Itupa i Lalo.

**Afioga Tafua Maluelue Tafua:** Malie lava lau Afioga i le Minisita e leai e le fia faalavelavea le saunoaga, leaga o lea e i tatou faamaumauga le umi o le malae vaalele lea e i Tiavea, o le taimi nei e le i oo i le 1,400 mita. O le taimi nei e na o le 867 mita le umi la e i ai i le taimi nei ma le faaaloalo. Faafetai lava.

**SUI FOFOGA FETALAI:** Ia lelei faafetai, mo fautuaga, tulai mai lau Afioga e faaauau lau saunoaga matagofie.

**Susuga Hon PAPALIITELE NIKO LEE HANG:** A faapea ua sese atu ua sese faamaumauga ia e aumai. Ae e fai lava ia le mea e talafeagai, faafetai mo le fautuaga.

Ia o lea la i Faleolo lea o le a o le a faaopoopo 300 mita i le itu i Sasae i le alasesee ina ia maua ai le 3,100 mita o le a mafai e so o se vaalele lapoa, e tai pei o le A-340 ma le B-787, ona lele ese atu ma se uta mamafa e tusa ma ona tapulaa.

Fausia se fale e fai ai galuega tele faaleleia po o se hanger lapopoa i Faleolo. Faatu se aoga mo tagata faigaluega i vaalele savili m o Samoa ma lenei itulagi o le Pasefika, Regional Aviation Training Centre. O le tatou malae i Maota e fia faaleleia fale faatali pasese ma fale e faaee ai pasese. Faaopoopo le 300 mita mo alasesee o vaalele e atoa ai le 1,000 mita lona umi. Toe faaleleia le pa fence o lo o siomia ai le malae. Fausia o le faletalimalo VIP. I le malae i Asau, toe faaleleia le alasesee ai vaalele, faafou le pa o lo o siomia ai le malae. Le malae i Tiavea, toe faaopoopo le umi o le malae i le 700 mita le umi o lo o ia i le 960 mita, lea la ua tali atu i le concern lea na aumai i le Afioga i le Itupa i Lalo. Fausia fale e faatali ma fale e faaee ai pasese i Tiavea

Lau Afioga ia o lisi ia o galuega fuafua e le Sector lea i lalo o lau vaavaaiga, e aofia ai mea o galuega tau auala, suavai, eletise, ia o se oototoga la ia o galuega aua le agai atu i luma. Ae ona oo mai lea o sau faamatalaga lau Afioga i le lauga autu.

Lau Afioga i le Fofoga Fetalai, o le lona 4 lenei o Nofoaiga a le Palemene, o filifilia ai lou faatauavaa, e fai ma sui usufono o le itumalo,

muamua Palota Taitoatasi Individual Voters, sosoo ai ma le Itumalo Nuu Tu Taulaga Sasae, po o le Urban East. Sa faalupe lava nei itumalo e 2, o le paia ma le mamalu o Samoa aoao. O le Paia lava ma Mamalu o Tama ma Aiga, Aiga ma Tama, Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ae lau Afioga i le Fofoga Fetalai, o lea la o le a ou sauni atu i le Faiga Palota 2021 ia Aperila mo le Itumalo o Vaimauga Nu.3. Ae se i oo atu lau folasaga i si ou itumalo fou, ona ou talanoa atu lea i ona tulaga faalupeina. Awe lau Afioga i le Fofoga Fetalai, o le a amata atu sau faamatalaga faafetai i lou itumalo Tu Taulaga Sasae faapea foi sau folasaga faafeiloai i lou Itumalo Palota o le Vaimauga Nu.3.

Lau Afioga i le Fofoga Fetalai ae ou te le i laasia le pulapula ma faeava le lautifa i le malae, i se faamatalaga i lou Itumalo Fou i Vaimauga Nu.3, ae se i ou liliu ane e molimoli le agaga faafetai i lou itumalo faapelepeleina, o le Nofoa Tu Taulaga i Sasae, na afua ai ona ou oo mai i le Palemene o Samoa. E le faagaloina Afia i si ona vao.

E muamua se faafetai i le afaigaluega tofofi a le Atua i fatafaitaulaga e fia i totonu o le tatou itumalo o lo o taia le ao pogisa ae faaosole ao pupula o le malamalama o Keriso i le lalolagi e ala i Lona finagalo paia. Faafetai tele faafetai tele i la outou talosaga molipo, moliao ua maua ai le malosi i le tino, o le mafaufau aemaise le agaga. A o lea ua faaifo le ataata o taulaumea i lenei Paeaiga o le a faaiu ae o lo o sologa lelei ma manuia mea uma. Faafetai atu i le tapuaiga a tupu ma ee, o tama ma tina matutua seia oo atu lava i tupulaga faiae o e sa lagolagoina lou nei tagata faatauvaa e avea ma o outou leo i le Palemene o Samoa i lenei Paeaiga o le a maea. O upu masani lava a le atunuu, o le faiva e sii ae tapuaia, e manuia. Faafetai tele i lau tapuaiga, sa outou tui lava le mulipapaga, po le fala ma ula le mulila ma tapuai leleoa. Faafetai topule, faafetai lou agalelei. O a ni faaletonu a o se tautua foi ua pao ma ua le lava a la outou auauna, faamolemole faamagalo le tagata. O a foi ni galuega e le i mafai ona faatinoina i lou taimi, e oso pea le la o le amiotonu a le Alii, faataunuuina e se isi foi Faigamalo e tulai mai mo le isi 5 tausaga e tusa ai ma le finagalo o le Atua Silisili Ese.

O lea o le a faaseese lou vaa mai lou ogasami ae se i folau i le vasaloloa i lou itumalo fou faapalota o Vaimauga Nu.3 o le a ou tauva ai i le faiga palota 2021. Lau Afioga i le Fofoga Fetalai, ona ou oo mai lea i lou itumalo fou o Vaimauga Nu.3. Lau Afioga o le itumalo o Vaimauga Nu.3 e aofia ai afioaga nei; Matautu-tai, Matautu-uta, Faatoia, Leone, Maagao, Magiagi, Lelata, Tanugamanono, Papauta, Loimata o Apaula, Sekema-fou, Papaloloa, Vailima, Alaoa, Vaoala, Letava, Malololelei, Afiamalu, Tiavi ma Palapalaloa. O upu masani e sui faiga ae tumau lava faavae. E fotuai mai suiga o faaupuga po o igoa foi, e mafai ona sui tuaoi faapalota, ae tumau lava ou sa e le avea. O faalupega faavae o nuu ma itumalo ma sa



tapuia, ua maea ona faataoto mai e tuua ua lalago mai tiasa sa latou mamamu faatiti ma sui faasolo le gagana faasau, lea ua tatou oaoa ai nei i faleseu ae saa i maa o malie. Ae ou te muai fia faaleoina le paia o le tatou fale Vaimauga, le mamalu o Fuaiupolu i lena itu o le vai, i le afio o Tofaeono o le Matua, afifio Asi ma Patu, afifio Aiga e 3, maliu mai laua na tai, susu mai le Tuiataga ma le usoalii ma oulua le Launiu Saelua ma le moafagatau, alaalatai le nofo a ituaiga ia Fuata. Le paia o le faletolu o Sagauga aua le afifio o Alosina, afifio laua Matua, afifio Usoalii, afifio le Aiga Salevalasi, susu Alo o le Malietoa, alaalatai le Faletolu ma le Vainalepa. O sa tatapu na ma mamalu tuituifafao na o le tatou fale Vaimauga, e tumau lava e le gafataulimaina i se tautalaga a la outou auauna faatauavaa.

O lea ua faatulaga ma faataoto lo tatou itumalo faapalota fou o Vaimauga Nu.3 e tapena atu ai lo outou sui tauva o Tapunuu Papaliitele Niko Lee Hang o le Vaega Faaupufai e Puipuia Aia Tatau a Tagata le HRPP mo lenei 5 tausaga. E ui ina fou le itumalo faapalota, ae le fou la outou sui tauva. Ua loa ona tatou mafuta ma nutimea faatasi i lo tatou itumalo, tainane upufai o Malo. Ua tele tausaga o tautua i lalo o le tagavai a le HRPP. Ua iloga ma olaola ana galuega lelei i le tautuaina o Samoa i so o se tafa ma e le uma le fia tautua atunuu ma le fia faaaogaina pea o le soifua ma le ola o totoe e fai ai sou sao mo oe lou itumalo pele, aemaise Samoa i lona aoatetele, i le anoanoai o mea o fia faaleleia atili aemaise galuega faaauau pea aua le manuia o le tatou itumalo faapea Samoa atoa. Ou te fia faaaogaina le alagaupu faa-Peretania lenei, “Actions speaks louder than words.” Pe a faa-Samoaina, e leotele atu galuega i lo upu ma tala. E tautala galuega ua tino mai nai lo folafolaga soonafai.

Lou itumalo o Vaimauga Nu.3, ou te faatauaina lou finagalo ma lau tuualalo aua o i ina o lo o i ai le tofa ma le moe e manuia ai aiga, nuu ma le Malo, aemaise o le fai lava o lau filifiliga saoloto mo lau palota. Manatua a sao lau filifiliga i le aso, o le a manuia taeao. Ou te le fia faia foi ni folafolaga po o ni tautinoga, i meaane ua le ogatasi le futia ma le umele ona fuatia lea o lou tagata. Ae o tofiga foi o Taitai o le atunuu, e valaauina ma tofofi mai e le Atua Silisili Ese. O lena ua e silafia ma ou iloa. Ae ou te fia tautua tele mo oe lou itumalo o Vaimauga Nu.3 pe a to mai lau pule ma lou faatuatuaga ia te au. Ia faatasi mai le Atua ia uli ma sao le faamoemoe o Samoa i lana faiga filifiliga, ia fili i le tai, fili i le vao tautai mataalia e faatautaia le sa o Samoa mo le isi 5 tausaga. O le tatalo ina ia faatumauina pea lo tatou nonofo fealofani ma le fiafia aua e taaalo lava tama a o se uso.

E muliai ae le itiiti lona taua o le faafetai faapitoa mo lou nuu pele o Vailima po o le vai na tuutuulima. O mamalu lava ia e faasino i le afio o le Tapunuu, lau Afioga Sooalo, afifio Aiga, alaalatai le Matua Fetalai ia Foitau, lo la toalua ia Puaalatamai ma Puaasegisegi, le Lauti na Laulelei ma le nofo a ituaiga i le Tulafale. Lau Afioga i le Sao lau Afioga Sooalo

Harry faapea sulī ma feoi Henry faapea sulī ma feoi, faafetai faafetai faafetai tele i la outou faaaloalo maualuga e ala i lenei suafa taua ua toina mai mo au le tagata faatauvaā. O upu e faasino i Tanugamanono, ua ou tu i Sinave ma Ulumotootua ae tepa i le maualuga o le mauga o Mateao ae le i soifua mai Vaea, ma faapena le maualuga o lau faaaloalo, o lea ua ou titifi ai i lou maau ma ou ninifi ai i lou alofa faasoa, ua e faapale lenei tagata le taualoa i lau faasolo, le tuiveevee lea ua ou sasapi malimali ai. Ua e asuasua mai i ou lima le vaimalu mai ou vaipuna ma vaieli ma faainu ai lota galala e pei o le upu i lo ta nuu o le vai na tuutuulima. Ua outou to le matupalapala, o lau pule to ma lau pule faasoa, se ua faamalo faaeaea. Ia ae tuu maia lou aao, faasipa mai lou tauau tali avega ma faamafola mai lou alofilima lautele e lagolagoina ai Tapunuu i le faiga filifiliga o lo o loma nei ma tuu atu i le Atua lo tatou faamoemoe.

Lau Afioga i le Fofoga Fetalai, ou te le faia le upu a Iakopo i le la fagatuaga po o le tauiviga se i tulou, ma le agelu a le Atua. E feoloolo foi le Mataupu Silisili lea e ia te au. Mai le Kenese 32 fuaiupu e 26; ua fia alu le agelu ae o le a ao mai lava, ae o lo o taofiofi pea e Iakopo le agelu. Ona fai atu ai lea o Iakopo i le agelu a le Atua, ou te le tuua lava oe e te alu seia e muai faamanuia mai ia te au. Faafetai, faafetai, faafetai tele lou nuu mo a outou faamanuiaga.

Lau Afioga i le Palemia, e fia momoli atu le agaga faafetai tele i lau Afioga i le taitaiga o le tatou Malo. O lau tofa manino, lau tofa tuusao, tofa tatala ae lauama tootoo i le finagalo o le Atua, lea ua manuia ai Samoa i lona lava lotoifale, ae ua tumatie ai foi Samoa i lenei itulagi o le Pasefika i le va ma isi Malo. E le tau laeia le maa piitia ma e le tau faasega ma tau faafuluina le pa osofia, ae tau lava o se mea e iloga ai. Faafetai i lou faatuatuaina ma le filifilia o lou nei tagata faatauvaā e aveā ma Minisita o lau Kapeneta i lenei Paeaiga ua maea. O le upu moni lau Afioga i le Palemia, ua le tasi ae ua lasi lau faaeaea mo lenei tagata faatauvaā. Faafetai faafetai faafetai tele. Ou te tatalo pea i le Atua ina ia faafualoa lou soifua i le tino maloloina ma le mafaufau mataala i tofi ma valaauina eseese aemaise ai le agaga.

Lau Afioga i le Fofoga Fetalai lau Afioga Toleafoa Faafisi, ia, masalo o lena e te faafogafoga mai i le alaleo, faafetai atu i lau Afioga mo lenei 5 tausaga o le tatou mafutaga, faamalo atu le onosai, o lau tofa faatupu ma le tofa faale-Atua sa toamalie ai le Fonousu a Samoa. Tau ina ia agalelei le Atua ia faafualoa pea lou soifua laulelei aua nisi faamoemoega taua o le lumanai aua lou valaauina.

Lau Afioga i le Fofoga Fetalai, e le faagaloina i le loto, le mafaufau ma le agaga le tautua tuavae, tautua mataalia, e le faalogologotiga, tautua loto atunuu a Pulega ma Faauluuluga uma a Matagaluega ma Faalapotopotoga Tumaoti eseese a le Malo. Ae faapito augafa le loto faafetai tele i Ofisa Sili o Pulega o Matagaluega ma Komiti Faatonu uma sa i lalo o lau

faamalumaluga, malo afua taeao ua maua, malo le galulue, faafetai lototetele. Sa ou matauina lava ma le totoa lo outou saili atu i mea silisili ona lelei aua le tautuaina o le atunuu lautele, aemaise foi le tele ma le anoanoai o a outou fautuaga na tuualalo mai ai, na itiiti ai lape ma faaletonu i Matagaluega. Fai mai le taitai o se tasi o Ekalesia iloga, when performance is measured, performance exceed, but when performance is measured and reported, performance accelerate. A faa-Samoaina lea faaupuga, a lelei siitia maualuga ma lipoti atu la tatou auunaga, o le a televave ma saosaoa le faatinoga o so o se galuega. Faafetai faafetai faafetai tele, o outou mama na, sagai ane ai o le tai i o outou faiva alofilima.

Lau Afioga i le Fofoga Fetalai, e muliai sau faafetai faapitoa i lau Minisita Lagolago le Susuga ia Seiuli Ueligitone o le Alo o le Malietoa. Ua tele ta galuega sa faatino i lenei Nofoaiga, ia viia ai pea le agalelei ma le alofa o lo tatou Tapaau Silisili o i le Lagi. Ia alofagia ma faamanuia e le Atua lou faamoemoe mo le faiga palota o loma nei.

Lau Afioga i le Fofoga Fetalai, e le faaititia foi le agaga faafetai i le paia ma le mamalu o tupu ma ee mai Tumua ma e na pule i Salafai sa matou galulue faatasi i lalo o au Komiti Faufautua i le Matagaluega o Galuega Tetele ma le Pulega o le Suavai. E tele ma taua la outou sao ma e momoli atu ai lau faamalo ma lau faafetai mo mea lelei uma sa tatou galulue faatasi ai i lenei 5 tausaga. Ua tatou molimauina le tele o galuega sa tatou faatino i o tatou taimi, ia saga viia ai pea le alofa ma le agalelei o le Atua. E tautala lava galuega ua tino mai i lo le tele o faamatalaga ae leai ni galuega e ono faatino.

Le mamalu e o le Palemene ma Samoa aemaise ou uso a Minisita, o lea ua faamaeaina lenei Paeaiga, malo le galulue, malo le tautua atunuu. O lau tofa faatupu, le tofa tatala ma le tofa sailimalo o lea ua ae manuia ai o tatou faiva. E le asa lava se faiva ma se maumau. E potu lava le tautai ae le atoa i'a o lona sa, ae o a foi ni galuega ua maea faatino ua lelei ma matagofie ma tauleleia i lenei Nofoaiga, ona tatou faapea ifo lea pei o la le Tusi, "o matou lava o auuna leaga ma le faatauvaa. Ia aua lava ne i ia te i matou a ia tumau pea le viiga ma le faamanu i Lona Suafa Paia." E lelei le Atua. Ia manuia lau faiga filifiliga Samoa.

Lau Afioga i le Fofoga Fetalai, e i ai nai Matagaluega ia ua misi ia te au, ae le afaina se i maua se isi avanoa leaga ou te vaai atu ua uma foi le taimi. Lau Afioga i le Fofoga Fetalai...

**SUI FOFOGA FETALAI:** O lo o maua lava le avanoa e saunoa ai, o le lauga mulimuli lea a lau Afioga.

**Susuga Hon PAPALIITELE NIKO LEE HANG:** Masalo pe se i faauma atu ai le taimi a? Lau Afioga se i faamaea atu pea lea. O le a se aga

a o se upu ua le tautamalii, faamolemole aua ne i liaina i ala ae natia i fatualavai. O le a foi Apaula i Mateao ma solomuli le Tapunuu i le vai na tuutuulima. Soifua ma ia manuia, ae o le a faaauau atu le isi vaega lea i le lauga e faamaea atu ai. Faafetai foi i lau Afioga i le avanoa ua toe tuuina mai.

**SUI FOFOGA FETALAI:** Ia, malie le Afioga i le Minisita se i tuu atu le avanoa i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, a o le i faaiuina le saunoaga a le sui usufono, e pei e lelei foi...se i fai se malologa. E i ai nai vaega e 2 ia e taua tele ina ne i te i ua le o oi ai se upu sa saunoa ai le Minisita. E taua tele ona e soosootauau ma matafaioi o lo o i lalo o le Minisita. O lea sa taua e lana saunoaga le vaega muamua, o lea sa taua le atinae lea o le moli o le ava i luga o Vaea. E taua tele le atinae lenei. I le matou faigamalaga na foi mai le aso talu ai ina ua maea ona fai le sauniga o le tuu aloaia atu o le faleaoga o Samata i uta, na matou omai ai i le vaa a leoleo. Matou te taunuu mai i gatai po ua tea laititi lava le 8 i le po, ona tau autilo mai lea o le moli o le ava. E tele lava le faaletonu ma o se tasi o atinae o lea ua amata, ua siitia ai le moli o le ava mai le mea sa tu ai i lalo mai, ma ua siitia atu maualuga, ina ia faigofie ona tatai mai vaa mai totonu o le ava. Ma o le moli lea o le ava, o se satauro o lo o ua maea foi ona tusia ata, ma o se satauro tele lava e tu mai luga o le mauga o Vaea e tatai mai ia vaa. Ma o se tasi lena o icon iloga i le tatou atunuu, e tele le agaga lea e tu ai i tua, o le tatai saogalemu mai o vaa i totonu o le taulaga, ae o le satauro foi o le Alii e faailo ai le atunuu lenei, o le atunuu kerisiano, o lo o tatai mai e le satauro latou ina ia saofaga i le ola e faavavau. Tasi lenei faailo o lo o faaoga e le tele o atunuu, aemaise lava Amerika i Saute. Ma ou te faafetaia foi le agaga faatupu manatu ina ia faaoga le satauro ma moli emoemo e tulaia mai lava mai luga o le satauro agai i lalo ma faapea foi ma autafa i le mean a faasatauro ai lo tatou Alii, ae mumu emoemo faasoloatoa i le po.

Ua uma ona tapena uma tapenaga e aofia ai ma... e moomia le suatia o le eleele ina ia agai i lalo ma mautinoa ai le malosi o le satauro e fai i uamea ma sima ina ia malosi, ona o lo o tu mai i le maalaetae faafeagai ma matagi malosi ina ia tumau ai lona tulaga e le maluelue. Ia o lea foi la ua faataoto le auala e alu atu ai i luga, o le igoa o le auala, o le Ala i le Satauro. Ma o le faamatalaga lena ua uma ona tapena le faamoemoe lea, toe lava ina faamaea ma faagasolo loa lona fausia. O le taua lena o le moli lea o le ava, ona o lea ua matua ou vaai lelei i ai i le faigata o lo o feagai ma vaa e fia faaofi mai totonu o le ava i le po. O le itu taua lena.

O le vaega 2 lau Afioga ou te fia taua, lea sa saunoa foi i ai le Minisita, o le malae taalo mo fanau, lea e fausia i le va o le fale o le Malo, o le faletele lea o le Malo ma le agai atu i le sami, e faigofie ai ona mataitu le taoto mai a le malae pe a alu atu le tagata i luga i le lifi ma tilotilo ifo i lalo. O lo o taofia i le taimi ne, ona o lo o faatali pea i latou foi o le aufaigaluega na o e malolo i le kerisimasi ae aafia ai loa i le Koviti. E aofia ai foi la ma latou o lea o lo o faatali pea i ai le faamaea o le museum po o le fale lea e teu ai measina a Samoa, le faletele lea e fausia i Malifa, faapea ai foi ma isi a tatou poloketi po o atinae ia e talia i Tafaigata, le kolisi maua luga faaleoleo.

Ua ala ona ou taua le itu lea, ona o lea e i ou luma faasalalauga a latou ia e toa-fa e le o nofoia o latou nofoa, ma o lo o faia pea a latou talaiga e pei ona masani ai ma faaleaga foi ma tuuaia ai faapea ua leai ni tupe a Saina. O tagata ua lauiloa i le mea lea o le pepelo, e pei lava ona ou taua, ua matua malamalama i ai le atunuu i mea ia o le fai o faamatalaga le faavaea. Ma ou te taofi e tatau lava ona oooo i ai sau upu, ona o latou mea ia e fai nei e le o nofoia o latou nofoa. Na pau lava ia o talaiga ia e fai, o le taumafai e faaleaga uma lava mea lelei o lo o faia e le Malo. Ma o lea e i ai le faamoemoe o le a fai i ai le gaoioiga, o se gaoioiga po o le aso a taeo ina ia faataoto ai se aulape, ina ia taofia ai ni uiga le popoi faapenei, uiga e faatuala i le Palemene lenei, ae tainane le mamalu o le Fonousu lenei. E le moomia e Samoa ni tagata faapenei, ni tagata e pei ua faatuala mai i le pule a le Palemene. E le moomia, e le moomia e le atunuu lenei ni tagata faapenei, ae o lea o lo o pisi pea e o i itumalo o a outou Afioga e pei e foliga mai ua sili atu lo latou tomai e fai le talaiga lea, o le talaiga e molimau pepelo uma ai mea uma o lo o fai nei. Ma e ou te le augata e tatau pea o latou uiga, ina ai nofouta i ai le atunuu lenei i le matautia o ituaiga taitai faapenei e tulai mai e taitaia le Malo o Samoa.

Lau Afioga i le Fofoga Fetalai, o lou tulai atu lena ia aua lava ne i moea le po lenei a o le i faasaoa mea o talaiga sese, o talaiga e fai e mea o tevolo, na o tagata o lo o pulea e tevolo o latou mafaufau. Ia manuia le tatou Fono.

**SUI FOFOGA FETALAI:** Ua faamalo saunoa i lau Afioga i le Taitai o le Maota, ma ua faafofoga foi le Palemene aemaise le tapuaiga a Samoa i le tulaga o le avanoa ai o nofoa ia. E tatau foi la ona oo i ai se faamatalaga a le Nofoa. E oo ma i i le taimi nei e le i oo mai se faanoi a sui usufono ia e pei ona taua pea i lenei afaifi.

Peitai o le Tulafono Tumau a le Maota e 24 o lo o manino ai black and white: “Sui usufono ia auai i galuega a le Fono Aoa. E leai se sui usufono e tatau ona toesea mai galuega a le Fono Aoa e aunoa ma le tuuina atu o se faatagaga e toesea ai e le Fofoga Fetalai.” E pei la o le saunoaga a le Afioga i le Taitai o le Maota i lenei afaifi, lea ua ia saunoa ai i le tulaga o aulape. Ma o le agaga foi lea o lea ua manatu ai le Nofoa e tatau ona

silasila i ai. E foliga ai ua le amanaia ma ua tau maualaloina ai le mamalu o le Maota lenei, ma ua foliga ai, tulou, ua faasiliaupule. O upu tuusao ia, i le tulaga na tauto ai i luma o le Atua, le tautoga o le faamaoni. E faatinoina le valaauina, afua mai i le aso na tauto ai seia oo lava i le aso mulimuli. Peitai, ua foliga i lenei afiafi ua ma fesootai ma le Failautusi, e le i oo mai se faanoi. E lagona ai le vaivai o le Nofoa. O lea lava e taumafai le Nofoa e tausi le mamalu, le va nonofo ai i le avafatafata ma le tulaga o tu ma aga a le atunuu. Peitai, e le mafai foi ona nofonofo ma nofoloa le Nofoa, e ao lava ona silasila i le tulaga o aulape, ae ua maea foi ona faataoto i le Tulafono Tumau 25 aulape o le Tulafono Tumau e 24 pe afai ua toesea e aunoa ma se faatagaga.

O le mea lea e ao ona ou faasilasila i le Maota ma le faafofoga a Samoa, leai e le ela le vaai a le Nofoa, tulou. A ua taua pea i le saunoaga, o lea foi na saunoa le Afioga i le Minisita o Galuega Tetele ma taua ai sui usufono mamalu ia i tulaga o le taumafai lava e faavaivaia le atinae o taumafai i ai le Malo, aemaise le uafu lea pei ona faamoemoe i ai. O le agaga la o lenei afiafi, e ao ona ou faailoa atu le mea lea ina ia silafia e le Maota ma le faafofoga taputapu mai a le atunuu, e le nofonofo le Nofoa. O le aso a taeao e tatau ona fai ai se feiloaiga ma sui usufono mamalu ia i le agaga o le toesea ai e aunoa ma se faatagaga a le Nofoa. O le faasilasilaga lea ina ia silafia ai e le Maota le galuega o lo o faatino nei.

Malie lau Afioga i le Minisita o Galuega Tetele, o lea ua tatou taunuu mai i le taimi e manava ai tatou galuega o lenei afiafi. Ae o le aso a taeao, o le a tuu atu foi le avanoa e faaauau ai lau saunoaga ma faamaea aloaia ai ma avatu foi se faafetai a le Nofoa.

Avea ia lenei avanoa ou te avatu ai le faamalo ma le faafetai i le paia maualuga o le Palemene i ona tulaga faalupe, lau Afioga i le Taitai o le Malo faapea foi le Aiga Kapeneta, Minisita Lagolago ma le mamalu o sui usufono mamalu uma o le Palemene. Ia, matou faapea atu, malo le usufono, malo le faatoa mo lenei aso. O le uluai aso lenei o lea ua tatou Fono po ai. O le faamoemoe lava, ia maua se ai o le tapuaiga mamalu a si o tatou atunuu i lo outou valaauina ma a outou galuega fai. Ia tau ia ina matou faapea atu, foi le viiga i le Atua, o le ona le mana ma le malosi uma lava, ua afua ai ona maua lo outou soifua malosi aua le faaauauina o tiute ma faiva e pei ona valaauina ai.

E liliu foi ma faamalo i le tapuaiga leleoa a le atunuu, ua ae manuia faiva o lenei afiafi o lau Palemene, ona o la outou tatalo ma tapuai mai.

E momoli foi le faamalo i le paia o Ofisa Sili o Pulega o Matagaluega ma Faalapotopotoga a le Malo, malo le onosai mai, malo le onosai mai. O lena ua outou faafofoga o lea ua amata ona sasaa faaoti le utu a le faimea i Afioga i Minisita aua outou faiva alofilima sa outou feagai ai i lenei 5 tausaga. Na ona momoli atu o le faafetai tele a le Nofoa aua lo outou gapatia, faamanuia le Atua i galuega sa faatino.

Ia, le paia e o le Palemene, o le a se gagana a le Nofoa ua le tautamalii i la outou faafofoga ia ma le faatautaiga o lenei afiafi, matou te faamalulu atu, fale i le fale o le Atua lo outou finagalo e magalo ai se le atoatoa o le Nofoa. Talo soifua i le agalelei o le Atua i le aso a taeao e momoli i ai lo outou soifua ma le ola e faaauau ai la tatou galuega e pei ona atofaina.

Ae tatou te le i tolopo, ou te tapa ma le faaaloalo le Afioga i le sui usufono mo Salega Sisifo e te saunia se tatalo e faaiu ai le tatou Fono.

**Afioga Toomata Aki Tuipea (Salega Sisifo):** Faafetai i lau Afioga i le Fofog Fetala. E tasi lava si faasaoga mo faamaumauga, o le igoa o le faleaoga lea sa outou afifio atu ai, o Fagafau ma Samata i tai Primary School ae le o Samata i uta. Ma lou faaaloalo lava, mo faasaoga o faamaumauga.

*Na tolopo Taulumaga a le Fono Aoa Fautulafono i le itula e 10:06 i le po seia aulia le Aso Tofi, 25 Fepuari 2021 i le itula e 9:00 i le taeao.*